

BOSNA I HERCEGOVINA
FEDERACIJA BOSNE I HERCEGOVINE
VLADA

PREDNACRT

ZAKON
O SLATKOVODNOM RIBARSTVU FEDERACIJE BOSNE I HERCEGOVINE

Sarajevo, novembar 2021. godine

ZAKON O SLATKOVODNOM RIBARSTVU

DIO PRVI - OSNOVNE ODREDBE

Član 1. (Predmet Zakona)

Zakonom o slatkovodnom ribarstvu Federacije Bosne i Hercegovine (u daljem tekstu: Zakon) uređuju se upravljanje ribljim fondom, načela, nadležnosti i ciljevi, ribolovne vode, ribolov, akvakultura, zaštita ribljeg fonda u ribolovnim vodama, evidencije, nadzor, kaznene odredbe i druga pitanja koja su od značaja za slatkovodno ribarstvo Federacije Bosne i Hercegovine (u daljem tekstu: Federacija).

Član 2. (Slatkovodno ribarstvo)

- (1) Slatkovodno ribarstvo (u daljem tekstu: ribarstvo) je ekonomska i društveno korisna djelatnost koja je u funkciji integralne zaštite, uzgoja, održivog korištenja i stalnog poboljšanja kvaliteta ribljeg fonda, staništa, akvakulture i drugih ribolovnih resursa.
- (2) Riblji fond je državna svojina i prirodno dobro od opšteg interesa za Federaciju.
- (3) Ribljim fondom se upravlja na stručan i održiv način, koji doprinosi cjelokupnoj zaštiti ribljeg fonda i prirodnih staništa, te očuvanju biološke raznolikosti u slatkim vodama.
- (4) Ribe se u slatkim vodama mogu loviti i/ili uzgajati pod uslovima utvrđenim ovim Zakonom i propisima donesenim na osnovu njega.
- (5) Odredbe ovoga Zakona odnose se i na lov, uzgoj i zaštitu rakova, školjki, žaba, kao i drugih organizama koji žive u ribolovnoj vodi.
- (6) Veterinarsko-zdravstvena zaštita ribljeg fonda u ribolovnim vodama i ribnjacima vrši se na način kako je to regulisano odredbama propisa o zdravlju životinja.
- (7) Ovaj Zakon primjenjuje se na sva pravna, fizička i fizička lica - obrtnike, javne ustanove, udruženja ili organizacije sportskih ribolovaca koje obavljaju djelatnost u privrednom, sportskom, privredno-sportskom, selektivnom i sanacionom ribolovu, ribolovu u naučno-istraživačke svrhe i akvakulturi na ribolovnim vodama Federacije.

Član 3. (Definicije)

- (1) U ovom Zakonu pojedini pojmovi imaju sljedeće značenje:
 - a. **akvakultura** je uzgoj ili kultivacija vodenih organizama korištenjem tehnika osmišljenih da povećaju proizvodnju navedenih organizama preko prirodnog kapaciteta okoliša, gdje organizmi ostaju u vlasništvu fizičke ili pravne osobe tijekom faze uzgoja i proizvodnje, do i uključujući fazu izlova;
 - b. **alohtona vrsta riba** je riba neizvornog (stranog) porijekla i koja prirodno ne živi u nekom području, nego je u njega namjerno ili slučajno unijeta;

- c. **autohtona vrsta riba** je riba rasprostranjena u određenom geografskom području u granicama nastalim prirodnim procesima (bez ljudskih intervencija) i prilagođena životnim uslovima tog područja;
- d. **biološka raznolikost (biodiverzitet)** je raznolikost živog svijeta na zemlji, kako između vrsta tako i unutar vrsta;
- e. **ciprinidne vode** označavaju vode odgovarajućih hidromorfoloških karakteristika i kvaliteta, koje omogućavaju ili bi u slučaju smanjenja onečišćenja mogle omogućiti život riba iz porodice šarana (*Cyprinidae*);
- f. **dozvola** je pisani akt nadležnog organa na osnovu kojeg korisnik smije obavljati djelatnost privrednog, privredno-sportskog, selektivnog i sanacionog ribolova, ribolova u naučno-istraživačke svrhe, akvakulture, te ostale aktivnosti u skladu sa odredbama ovog Zakona i propisima donesenim na osnovu njega;
- g. **endemska vrsta riba** je riba rasprostranjena na određenom, obično uskom geografskom području i prilagođena specifičnim životnim uslovima tog područja;
- h. **godišnji program upravljanja** je dokument upravljanja ribljim fondom ribolovnog područja ili ribolovne zone tokom kalendarske godine, izrađen na osnovu ribolovno-privredne osnove za to ribolovno područje ili zonu;
- i. **ikra** je odomaćeni naziv za riblja jaja u svim razvojnim fazama;
- j. **kopnene vode** su sve stajaće ili tekuće vode na površini kopna i sve podzemne vode na kopnenoj strani od linije od koje se mjeri širina teritorijalnih voda;
- k. **lovostaj** je vremenski period u kojem se pojedine vrste riba, osim riba iz akvakulture, ne smiju loviti niti stavljati u promet;
- l. **matica** je spolno dozrela riba, bez obzira na spol;
- m. **mlađ** predstavlja različite razvojne oblike riba u dobi do postizanja spolne zrelosti;
- n. **mrijestilište** je objekat na ribljoj farmi u kojem se obavlja vještačka reprodukcija riba i uzgoj ribljih larvi;
- o. **održivo korištenje ribljeg fonda** podrazumijeva provođenje ribolova do te mjere da način i vrijeme korištenja omogućavaju njegovo prirodno samoobnavljanje i/ili sa posebnim mjerama upravljanja dugoročno očuvanje ribljeg fonda, a da se pri tome ne ugrožava povoljno stanje biljnog i životinjskog svijeta;
- p. **pomor ribe** podrazumijeva povrjeđivanje, oštećenje, ubijanje i svaki drugi oblik uništavanja ribe u količini većoj od 20% od ukupnog ribljeg fonda procijenjenog ribolovnom osnovom na određenom ribolovnom području ili u određenoj ribolovnoj zoni;
- q. **poplavljeno područje** je područje uz vodotok koje može biti poplavljeno uslijed izlivanja vode iz korita, tokom poplavnog događaja;
- r. **poribljavanje ribolovnih voda** je plansko unošenje ribe, mlađi i oplođene ikre u ribolovne vode u cilju održavanja i unaprjeđenja ribljeg fonda;

- s. **posebno stanište** je dio ribolovne vode koji ima posebnu zaštitu zbog svoje uloge u obnavljanju ihtiopopulacija prirodnim putem, a može biti mrijestilište, rastilište, hranilište, zimovalistište ili migracioni put;
- t. **prirodno plodište** je dio ribolovne vode u kojem se ribe mrijeste (razmnožavaju) prirodnim putem i u kojem se odgaja mlad;
- u. **privredni ribolov** je djelatnost koja podrazumijeva lov ribe profesionalnim ribolovnim alatima i opremom, radi stavljanja ulovljene ribe u promet i sticanja dobiti;
- v. **privredno-sportski ribolov** je djelatnost koja podrazumijeva pružanje usluga u obavljanju sportskog ribolova na ribnjaku, radi stavljanja ulovljene ribe u promet i sticanja dobiti;
- w. **privremeni program** je program ulaganja i upravljanja ribolovnim područjem/zonom do donošenja ribarske osnove;
- x. **program revitalizacije životnih zajednica** je stručna studija o uslovima i načinu obnavljanja i zaštite životnih zajednica, posebno ribljeg fonda, u ribolovnim vodama u kojima je došlo do značajnih promjena životnih uslova;
- y. **reintrodukcija (ponovno uvođenje)** je ponovno naseljavanje neke riblje vrste u područje u kojem je izumrla, a u eko sistemu još uvijek postoje ili su ponovno uspostavljeni približno jednak ekološki uslovi kao prije izumiranja a koji omogućuju njezino preživljavanje;
- z. **ribar** je lice koje obavlja privredni ribolov, radi stavljanja ulovljene ribe u promet i ostvarivanja dobiti;
- aa. **riblji fond** obuhvata sve vrste riba, mekušaca, rakova i ostalih vodenih organizama koji žive u ribolovnoj vodi;
- bb. **ribnjak** je omeđeni prostor na zemljištu, namjenski ispunjen vodom i uređen za obavljanje djelatnosti akvakulture ili privredno-sportskog ribolova;
- cc. **ribogojilište ili riblja farma** je objekat sa bazenima ili plutajućim kavezima, namjenski uređen za obavljanje djelatnosti akvakulture;
- dd. **ribočuvar** je službeno lice, stručno osposobljeno za obavljanje nadzora u sportskom ribolovu na određenom ribolovnom području ili zoni;
- ee. **ribolov** je lov riba u ribolovnim vodama uz upotrebu dopuštenih ribolovnih alata i opreme;
- ff. **ribolov po sistemu „ulovi i pusti“** je oblik sportskog ribolova u kojem se ulov ne zadržava;
- gg. **ribolov u naučno-istraživačke svrhe** je ribolov koji se provodi u svrhu realizacije naučnih i stručnih programa, projekata, studija, elaborata i svih drugih dokumenata vezanih za slatkovodno ribarstvo;
- hh. **ribolovac** je lice koje obavlja sportski ribolov radi sporta ili rekreacije;
- ii. **ribolovna dozvola** je odobrenje na osnovu kojeg ribolovci mogu obavljati sportski ribolov;
- jj. **ribolovna zona** je dio ribolovnog područja koja omogućava održivo korištenje i upravljanje ribljim fondom, te njegovu zaštitu i unaprijeđenje;

- kk. **ribolovne vode** su sve površinske kopnene vode u kojima stalno ili povremeno žive ribe i drugi vodeni organizmi i u kojima se može obavljati ribolov;
- ll. **ribolovni alat** je sredstvo kojim se obavlja ribolov;
- mm. **ribolovni revir** je dio ribolovne vode sa dobro očuvanim ribljim fondom, kojeg korisnik ribolovnog prava može koristiti pod posebnim uslovima ribolovnog režima;
- nn. **ribolovni režim** obuhvata mjere i aktivnosti koje se smiju provoditi u cilju obavljanja sportskog ribolova i koje moraju biti prilagođene prirodnim uslovima ribolovne vode: način obavljanja ribolova, dozvoljene ribolovne alate i opremu, količinu dozvoljenog ulova i eventualne zabrane;
- oo. **ribolovno područje** je prostorna jedinica koja obuhvata slivno područje nekog vodotoka ili njegov dio i kao takvo čini jedinstvenu hidrografsku, biološku i privrednu cjelinu;
- pp. **ribolovno pravo** je pravo upravljanja ribljim fondom u svrhu obavljanja sportskog ribolova, čuvanja, zaštite i unapređenja ribolovnih voda, ribljeg fonda;
- qq. **ribolovno-privredna osnova** je stručna studija o načinu korištenja i upravljanja ribolovnim područjem ili zonom, a odnosi se na obavljanje sportskog i privrednog ribolova;
- rr. **salmonidne vode** označavaju vode odgovarajućih hidromorfoloških svojstava i kvaliteta, koje omogućavaju ili bi u slučaju smanjenja onečišćenja mogle omogućiti život riba iz porodice pastrmki (*Salmonidae*);
- ss. **salmonidno-ciprinidne** ili **ciprinidno-salmonidne vode** označavaju vode odgovarajućih hidromorfoloških karakteristika i kvaliteta, koje omogućavaju ili bi u slučaju smanjenja onečišćenja mogle omogućiti život riba iz porodice pastrmki (*Salmonidae*) i riba iz porodice šarana (*Cyprinidae*);
- tt. **sanacioni ribolov** je ribolov koji se provodi u svrhu poboljšanja stanja ribljeg fonda u nekoj ribolovnoj vodi (sprječavanje širenja invazivnih alohtonih vrsta, premještanje ribljeg fonda u iznimnim situacija, i slično);
- uu. **selektivni ribolov** znači obavljanje ribolova ribolovnim metodama ili ribolovnim alatima koji ciljaju i love organizme prema veličini ili vrsti za vrijeme ribolovne operacije, što omogućava da se neciljani primjerci izbjegnu ili puste neozlijeđeni;
- vv. **strana vrsta** znači:
- (a) vrsta ili podvrsta vodenog organizma koja se javlja izvan poznatog područja svoje prirodne rasprostranjenosti i područja mogućeg prirodnog širenja;
 - (b) poliploidni organizmi i umjetno stvorene hibridne vrste bez obzira na područje njihove prirodne rasprostranjenosti ili mogućnost širenja;
- ww. **sportski ribolov** je djelatnost koja podrazumijeva lov ribe udičarskim ribolovnim alatima i opremom, radi sporta ili rekreacije;

- xx. **šteta pričinjena ribljem fondu** podrazumjeva svaki oblik promjena životnih uslova u ribolovnoj vodi i svaki oblik narušavanja zdravlja i ugrožavanja života riba.
 - yy. **ulov** predstavlja ulovljene, označene i zadržane primjerke riba u sportskom i privrednom ribolovu;
 - zz. **vodeni organizmi** su sve vrste koje žive u vodi, a koje pripadaju carstvima životinja, biljaka ili protista, uključujući sve dijelove, gamete, sjeme, jajašca ili propagule njihovih jedinki, koji su sposobni preživjeti i dalje se razmnožavati;
 - aaa. **vodotok** čini korito tekuće vode zajedno sa obalama i vodama koje njime stalno ili povremeno teku;
 - bbb. **zaštita ribljeg fonda** obuhvata skup mjera koje se poduzimaju radi očuvanja i unaprjeđenja ribljeg fonda i osiguravanja uslova za održivo i dugoročno korištenje ribljeg fonda i njegovog staništa.
- (1) Pojedini izrazi upotrijebljeni u ovom zakonu za označavanje muškog ili ženskog roda podrazumijevaju oba spola.

Član 4. **(Načela i ciljevi)**

- 1) Ovaj se Zakon zasniva na načelima da:
 - a) je riblji fond u državnoj svojini;
 - b) je riblji fond prirodno dobro od opšteg interesa za Federaciju i da ima njezinu posebnu zaštitu, u skladu s odredbama ovog Zakona.
 - c) riblji fond mogu koristiti svi ravnopravno u skladu s odredbama ovog Zakona i propisa donesenih na osnovu njega;
 - d) se riblji fond koristi i da se njime upravlja na stručan i održiv način;
 - e) se riblji fond ribolovnih voda u granicama zaštićenog područja prirode (nacionalnog parka, parka prirode, strogog rezervata i posebnog rezervata) koristi i njime upravlja u skladu s odredbama ovog Zakona i propisa donesenih na osnovu njega;
 - f) se osigura učešće zainteresovanih strana u donošenju akata i pristupa javnosti potpunim, tačnim i pravovremenim informacijama o stanju u oblasti ribarstva.
- 2) Ciljevi ovog Zakona su:
 - a) da se stručnim određivanjem granica ustanove funkcionalna i održiva ribolovna područja i zone;
 - b) da se dugoročnim planiranjem i stručnim programima obezbjedi održivo korištenje i stručno upravljanje ribljim fondom i očuvaju prirodna staništa;
 - c) da se adekvatnim i pravovremenim mjerama zaštite ribljeg fonda očuva i unaprijedi riblji fond, biološki diverzitet i ekološki integritet vodenih ekosistema;
 - d) da se posebnim mjerama zaštite i očuvaju endemske i ugrožene vrste riba i drugih vodenih organizama;
 - e) da se stručno osposobe lica koja obavljaju neki od poslova u slatkovodnom ribarstvu;

- f) da se ustrojem akvakulture omogućí njen brži razvoj, poveća obim proizvodnje i ojača konkurentnost na svjetskom tržištu;
- g) da se postiže i unaprijedi razvoj modernog sportskog ribolova i ribolovnog turizma.

Poglavlje I. Subjekti u ribarstvu i njihove nadležnosti

Član 5. (Federalno ministarstvo)

- (1) U obavljanju poslova iz slatkovodnog ribarstva u skladu s odredbama ovog Zakona i propisa donesenim na osnovu njega Federalno ministarstvo poljoprivrede, vodoprivrede i šumarstva (u daljem tekstu: Federalno ministarstvo):
 - a) analizira i ocjenjuje stanje ribljeg fonda i aktivnosti upravljanja i zaštite ribljeg fonda;
 - b) izrađuje Strategiju razvoja slatkovodnog ribarstva u Federaciji;
 - c) izdaje ovlaštenja i vodi evidenciju o izdatim ovlaštenjima za obavljanje naučnih i stručnih poslova u oblasti slatkovodnog ribarstva;
 - d) imenuje Komisiju za ispite u slatkovodnom ribarstvu;
 - e) imenuje Savjetodavno vijeće za ribarstvo;
 - f) priprema Programe za polaganje ispita u slatkovodnom ribarstvu, izdaje uvjerenja i vodi evidenciju o izdatim uvjerenjima o položenim ispitima u slatkovodnom ribarstvu;
 - g) izdaje saglasnosti i vodi evidenciju o izdatim saglasnostima na Ribolovno-privrednu osnovu (u daljem tekstu: Ribolovna osnova), Reviziju ribolovne osnove, Program revitalizacije i Reviziju programa revitalizacije;
 - h) izdaje dozvole i vodi evidenciju o izdatim dozvolama za privredno-sportski ribolov;
 - i) izdaje dozvole i vodi evidencije o izdatim dozvolama za posebne vidove ribolova;
 - j) izdaje dozvole i vodi evidencije o izdatim dozvolama za akvakulturu;
 - k) izdaje odobrenja i vodi evidenciju o izdatim odobrenjima za uzgoj autohtonih vrsta riba i drugih vodenih organizama;
 - l) izdaje odobrenja i vodi evidenciju o izdatim odobrenjima za uzgoj alohtonih vrsta riba i uvozu alohtonih vrsta riba i drugih vodenih organizama i oplođene ikre za potrebe akvakulture;
 - m) izdaje odobrenja i vodi evidenciju o izdatim odobrenjima za premještanje ribljeg fonda;
 - n) izdaje saglasnosti i vodi evidencije o izdatim saglasnostima o proglašenju posebnog staništa, posebnih riblovnih staza i ribolovnih voda sa zabranom ribolova;
 - o) izdaje saglasnosti i vodi evidenciju o izdatim saglasnostima na program i reviziju programa revitalizacije ribljeg fonda;
 - p) riješava žalbe izjavljene zbog oduzimanja ili uskraćivanja dozvola, ribolovnog prava ili nekog drugog dokumenta stečenog na osnovu ovog Zakona;

- q) utvrđuje potrebne mjere za otklanjanje ili smanjivanje štete na ribljem fondu nastale kao posljedica elementarnih nepogoda;
 - r) propisuje pravilnike i druge podzakonske akte koji proizilaze iz ovog Zakona;
 - s) organizuje poslove koji imaju za cilj sprječavanje ili smanjenje štetnih posljedica po ribolovne vode i riblji fond;
 - t) učestvuje sa drugim nadležnim organima u izradi programa i planova za korištenje prirodnih resursa;
 - u) vrši druge poslove i zadatke zaštite ribljeg fonda iz nadležnosti Federacije.
- (2) Propise koji proizilaze iz ovog Zakona donosi ministar poljoprivrede, vodoprivrede i šumarstva u Vladi Federacije Bosne i Hercegovine (u daljem tekstu: federalni ministar).

Član 6. (Kantonalno ministarstvo)

U obavljanju poslova iz slatkovodnog ribarstva u skladu s odredbama ovog Zakona i propisa donesenim na osnovu njega kantonalno ministarstvo nadležno za poslove poljoprivrede (u daljem tekstu: kantonalno ministarstvo):

- a) imenuje Komisiju za ribarstvo;
- b) vrši promjenu namjene ribolovne vode ili njenog dijela u slučaju proglašenja ribolovne vode ili njenog dijela zaštićenim dijelom prirode (nacionalni park, park prirode, rezervat, i sl.) ili područjem iz koga se zahvata voda za javno snabdijevanje pitkom vodom;
- c) vodi katastar ribolovnog područja;
- d) izdaje dozvole i vodi evidenciju o izdatim dozvolama za privredni ribolov;
- e) dodjeljuje ribolovno pravo na ribolovnim područjima i/ili ribolovnim zonama;
- f) zaključuje ugovore o obavljanju privrednog ribolova i dodjeli ribolovnog područja ili zone na korištenje;
- g) donosi rješenje o privremenom ograničenju ili zabrani privrednog ribolova;
- h) donosi rješenje o oduzimanju dozvole za privredni ribolov i ribolovnog prava;
- i) izdaje saglasnosti i vodi evidenciju o izdatim saglasnostima na Godišnji program upravljanja ribolovnim područjem ili zonom (u daljem tekstu: Godišnji program);
- j) propisuje način raspodjele sredstava uplaćenih za naknadu za obavljanje privrednog ribolova i naknadu za korištenje ribolovnog područja/zone;
- k) daje mišljenje na Ribolovnu osnovu i Reviziju ribolovne osnove, Program revitalizacije i Reviziju programa revitalizacije;
- l) daje mišljenje i vodi evidencije o izdatim mišljenjima o proglašenju posebnog staništa, plodišta i ribolovnog revira;
- m) vrši nadzor nad radom i poslovanjem korisnika ribolovnog prava i ispunjavanja obaveza proisteklih iz ugovora o dodjeli ribolovnog prava, Ribolovne osnove i Godišnjeg programa za ribolovno područje/zonu za koju je dobiveno.

Član 7. (Sportsko-ribolovni savez Federacije BiH)

- (1) Sportsko-ribolovni savez (u daljem tekstu: Savez) u smislu ovog Zakona obavlja poslove koji su mu povjereni ovim Zakonom:
- a) izrađuje i vrši distribuciju ribolovnih dozvola uz naknadu;

- b) izrađuje i vrši distribuciju uniformi, legitimacija i znački ribočuvara uz naknadu;
 - c) učestvuje u radu Komisije za ispite u slatkovodnom ribarstvu;
 - d) prikuplja godišnje podatke o količini i sastavu ulova u sportskom i privrednom ribolovu;
 - e) obavlja i druge poslove, u skladu sa ovim Zakonom i Statutom.
- (2) Savez pri vršenju poslova iz stava (1) ovog člana obavezan je da ispunjava minimalno sljedeće uslove:
- a) da djeluje na području cijele Federacije;
 - b) da ima osposobljena lica za sprovođenje poslova iz stava (1) ovog člana;
 - c) da ima potrebnu infrastrukturu za efikasno sprovođenje poslova iz stava (1) ovog člana.
- (3) Savez dostavlja Federalnom i kantonalnom ministarstvu godišnji izvještaj o sprovođenju poslova iz ovog stava (1) tačka (a) i (d) ovog člana, najkasnije do 31. januara tekuće godine za prethodnu godinu.
- (4) Sredstva za svoje djelovanje Savez obezbjeđuje kroz članarinu, naknadu za distribuciju prodanih ribolovnih dozvola u visini od 10% cijene dozvole od korisnika ribolovnog prava, doprinose članova, donacija, osposobljavanja sportskih ribolovaca i ribočuvara kao i drugih izvora.

Član 8. **(Ovlaštena ustanova)**

- (1) Naučne, istraživačke, stručne i druge studije i analize koje su u skladu sa odredbama ovog Zakona i propisa donesenih na osnovu njega, može izrađivati naučna ili stručna ustanova i pravno lice (u daljem tekstu: ovlaštena ustanova), koje posjeduje ovlaštenje za obavljanje naučnih i stručnih poslova u oblasti ribarstva.
- (2) Lice iz stava (1) ovog člana mora biti registrovano za djelatnost ribarstva i ispunjavati uslove propisane ovim Zakonom i propisima donijetim na osnovu njega.
- (3) Ovlaštenje za obavljanje naučnih i stručnih poslova u oblasti ribarstva izdaje Federalno ministarstvo, najkasnije u vremenskom roku od 60 (šezdeset) dana od dana podnošenja zahtjeva za izdavanje ovlaštenja.
- (4) Ovlaštenje za obavljanje naučnih i stručnih poslova u oblasti ribarstva izdaje se na vremenski period od 5 (pet) godina.
- (5) Federalni ministar će ovlaštenoj ustanovi za obavljanje naučnih i stručnih poslova u oblasti ribarstva Rješenjem oduzeti ovlaštenje ako prestane ispunjavati uslove ili se utvrdi da poslove ne obavlja u skladu sa odredbama ovog Zakona i propisa donesenim na osnovu njega.
- (6) Protiv Rješenja kojim se uskraćuje ovlaštenje za obavljanje naučnih i stručnih poslova u oblasti ribarstva, u skladu sa stavom (3), ili se ovlaštenje oduzima, u skladu sa stavom (5) ovog člana, nije dopuštena žalba, ali se može pokrenuti upravni spor kod nadležnog suda.
- (7) Pokretanje upravnog spora ne odgađa izvršenje rješenja.

- (8) Federalni ministar propisuje način i uslove koje moraju ispunjavati ovlaštene ustanove za obavljanje naučnih i stručnih poslova u oblasti slatkovodnog ribarstva, te druga pitanja vezana za obavljanje naučnih i stručnih poslova u oblasti slatkovodnog ribarstva.

Član 9. (Savjetodavno vijeće za ribarstvo)

- (1) Federalni ministar osniva Savjetodavno vijeće za ribarstvo.
- (2) Savjetodavno vijeće za ribarstvo ima konsultativnu i savjetodavnu ulogu i osniva se radi pružanja naučne i stručne podrške Federalnom ministru u oblasti ribarstva, potiče donošenje novih propisa iz područja ribarstva i sudjeluje u kreiranju ribarske politike.
- (3) Savjetodavno vijeće za ribarstvo čine predstavnici tijela federalne i kantonalne uprave, Saveza općina i gradova Federacije BiH, naučnih i stručnih ustanova, udruženja u ribarstvu osnovanih i priznatih u skladu s posebnim propisima.
- (4) Članove Savjetodavnog vijeća imenuje federalni ministar na period od 4 (četiri) godine.

Poglavlje II. Komisije, strategija ribarstva i savjetodavno vijeće za ribarstvo

Član 10. (Komisija za ispite)

- (1) Poslove u oblasti slatkovodnog ribarstva mogu obavljati samo stručno osposobljena lica.
- (2) Stručna osposobljenost za obavljanje poslova u oblasti slatkovodnog ribarstva stječe se polaganjem ispita u slatkovodnom ribarstvu: ribarski ispit, ribolovački ispit, ribočuvarski ispit, stručni ispit za ribarstvo i stručni ispit za akvakulturu (u daljem tekstu: Ispit).
- (3) Ispit se polaže prema Programu za polaganje ispita, kojeg priprema Federalno ministarstvo.
- (4) Ispite provodi Komisija za ispite u slatkovodnom ribarstvu (u daljem tekstu: Komisija za ispite), koju imenuje Federalni ministar.
- (5) U komisiju za ispite imenuju se stručna lica, najmanje VII stepena stručne spreme, iz Federalnog ministarstva, kantonalnih ministarstava, ovlaštene ustanove i predstavnik Saveza.
- (6) Troškove naknade za polaganja Ispita snosi kandidat koji polaže ispit.
- (7) Iznimno od odredbi stava (6) ovog člana, troškove polaganja ribočuvarskog ispita snosi korisnik ribolovnog prava.
- (8) Sredstva uplaćena za naknadu za polaganje Ispita su namjenska sredstva i koriste se za pripremanje i provođenje Ispita i naknadu za rad članova komisije iz stava (4) ovog člana.
- (9) Federalni ministar propisuje način i uslove polaganja Ispita, visinu naknade za polaganja Ispita i način raspodjele sredstava od naknade, način i uslovi rada Komisije za ispite, obrazac i način izdavanja uvjerenja o položenom ispitu, te druga pitanja vezana za ispite.

Član 11.
(Komisija za ribarstvo)

- (1) Komisija za ribarstvo u skladu s odredbama ovog Zakona i propisa donesenih na osnovu njega obavlja poslove:
 - a) provođenja Javnog konkursa za dodjelu dozvole za privredni ribolov;
 - b) provođenja Javnog konkursa za dodjelu ribolovnog prava;
 - c) provođenja poribljavanja ribolovnih voda.
- (2) Komisiju iz stava (1) ovog člana imenuje kantonalni ministar nadležan za poslove poljoprivrede (u daljem tekstu: kantonalni ministar) iz reda stručnih lica, najmanje VI stepen stručne spreme iz oblasti poljoprivrede.
- (3) Članovi Komisije za ribarstvo imaju pravo na naknadu za rad, koju posebnim rješenjem utvrđuje kantonalni ministar.

Član 12.
(Program razvoja slatkovodnog ribarstva)

Federalno ministarstvo će izraditi Program razvoja slatkovodnog ribarstva u Federaciji najkasnije 2 (dvije) godine od dana stupanja na snagu ovog Zakona.

DIO DRUGI - RIBOLOVNE VODE

Poglavlje I. Ribolovne vode i Pravo na pristup ribolovnoj vodi

Član 13.
(Ribolovne vode)

- (1) Ribolovnim vodama pripadaju sve tekuće i stajaće površinske vode.
- (2) U tekuće ribolovne vode spadaju rijeke, rječice, potoci, hidromelioracioni sistemi, kanali i svi drugi prirodni vodotoci u kojima postoji stalan ili povremen protok vode;
- (3) U stajaće ribolovne vode spadaju prirodna jezera, vještačke vodne akumulacije, močvare, bare, riječni rukavci, mrtvaje i sve druge prirodne vodne akumulacije koje imaju stalan ili povremen dotok ili oticaj površinskih ili podzemnih voda.
- (4) Ribolovne vode se, na osnovu bioloških karakteristika i kvalitativno-kvantitativnog sastava ribljeg fonda, dijele na salmonidne, ciprinidne i salmonidno-ciprinidne vode.
- (5) Ribolovnim vodama ne pripadaju:
 - a) vode u objektima akvakulture;
 - b) vode u privredno-sportskim ribnjacima;
 - c) vode iz kojih se zahvata voda za piće za javno vodosnabdijevanje ili su rezervisane za tu namjenu;
 - d) vode za koje su donesene odluke o zaštiti izvorišta na osnovu posebnog zakona.
- (6) Iznimno od odredbi stava (5) tačke c) ovog člana, kantonalno ministarstvo može odobriti obavljanje sportskog ribolova u ovim vodama, ukoliko isto ne ugrožava ili sprječava njegovu prvobitnu namjenu.

- (7) Kantonalno ministarstvo može izvršiti promjenu namjene ribolovne vode ili njenog dijela u slučaju proglašenja ribolovne vode ili njenog dijela područjem:
- a) iz koga se zahvata voda za javno snabdijevanje pitkom vodom ili vodom za ljudsku upotrebu;
 - b) za koje je donesena odluka o zaštiti izvorišta na temelju posebnog zakona;
 - c) zaštićenim dijelom prirode na temelju propisa o zaštiti prirode u kategorijama nacionalnog parka, parka prirode, strogog rezervata i posebnog rezervata;
 - d) za drugu namjenu od posebne važnosti za Federaciju.

Član 14.

(Pravo na pristup ribolovnoj vodi)

- (1) Ribolovac, ribar, korisnik dozvole za privredni ribolov, korisnik ribolovnog prava, korisnik rješenja za ribolov u naučno-istraživačke svrhe, selektivni ribolov i lice koje obavlja nadzor nad provođenjem propisa iz slatkovodnog ribolova imaju pravo pristupa ribolovnim vodama prilazima preko zemljišta koje se nalazi uz tu ribolovnu vodu.
- (2) Vlasnik, korisnik ili na neki drugi način posjedovnik zemljišta obavezan je dopustiti prijelaz preko svog zemljišta do ribolovne vode licu koje obavlja poslove u oblasti slatkovodnog ribarstva: privrednog, sportskog, selektivnog i sanacionog ribolova, ribolova u naučno-istraživačke svrhe i akvakulture.
- (3) Ako vlasnik, korisnik ili na neki drugi način posjedovnik zemljišta ne postupi u skladu sa odredbom iz stava (1) ovog člana, korisnik ribolovnog prava podnosi zahtjev za rješenje o privremenom korištenju zemljišta općinskom organu uprave nadležnom za imovinsko-pravne poslove, koji najkasnije u roku od 7 (sedam) dana od dana podnošenja zahtjeva donosi rješenje.
- (4) Žalba protiv rješenja iz stava (3) ovog člana ne odlaže izvršenje rješenja.
- (5) Lice koje obavlja poslove u oblasti slatkovodnog ribarstva obavezno je da prilikom prijelaza preko zemljišta do ribolovne vode ne utječe ili što manje utječe na stanje zemljišta iz stava (1) ovog člana.
- (6) Ako prilikom obavljanja poslova u slatkovodnom ribarstvu lice iz stava (1) ovog člana pričinu štetu prilikom prijelaza preko zemljišta iz stava (1) ovog člana obavezno je otkloniti nastalu štetu i zemljište dovesti u stanje prije nastanka štete.
- (7) U slučaju nemogućnosti potpunog otklanjanja nastale štete vlasnik, korisnik ili na neki drugi način posjedovnik zemljišta, na kojem je nastala šteta prilikom prijelaza do ribolovne vode, ima pravo na nadoknadu štete.
- (8) Visina i način nadoknade štete utvrđuju se sporazumno između zainteresovanih strana.
- (9) Ako se ne postigne sporazum o visini i načinu nadoknade štete, o visini i načinu nadoknade štete odlučuje nadležni sud.
- (10) Iznimno od stava (1) ovog člana zabrana prijelaza preko zemljišta do ribolovne vode utvrđuje se u slučaju ugrožavanja stabilnosti vodnog i priobalnog zemljišta u skladu s odredbama Zakona o vodama.

Poglavlje II. Ribolovna područja i Katastar ribolovnih voda

Član 15.

(Ribolovna područja i Katastar ribolovnih voda)

- (1) Radi održivog korištenja ribljeg fonda, u ribolovnim vodama se ustanovljavaju ribolovna područja.
- (2) Ribolovna područja se dijele na ribolovne zone.
- (3) Ribolovna područja i ribolovne zone određuje Federalno ministarstvo uz pribavljeno mišljenje kantonalnog ministarstva.
- (4) Granice između ribolovnih područja ili ribolovnih zona na tekućoj ribolovnoj vodi određuje se upravno na maticu toka od obale do obale, odnosno do glavnih odbrambenih nasipa.
- (5) Za ribolovne vode koje su istovremeno državne granice, granice ribarskog područja određuju se prema državnoj granici, upravno na maticu toka od obale do obale, odnosno do glavnih odbrambenih nasipa.
- (6) Određeno ribolovno područje, zonu ili neki dio zone Federalno ministarstvo može proglasiti ribolovnim područjem ili zonom od posebnog značaja.
- (7) Ribolovne vode u ribarskim područjima i propisane mjere zaštite i održivog korištenja ribljeg fonda upisuju se u Katastar ribolovnih voda koji vodi kantonalno ministarstvo.
- (8) Korisnici ribolovnog prava obavezni su kantonalnom ministarstvu dostaviti podatke neophodne za vođenje Katastra ribolovnih voda.
- (9) Federalni ministar propisuje biološku kategorizaciju ribolovnih voda, nazive ribolovnih područja i ribolovnih zona, njihovi granice, namjena (privredni i sportski ribolov, akvakultura), oblik i sadržaj obrasca, način vođenja Katastra, te druga pitanja vezana za privredni ribolov.

DIO TREĆI - RIBOLOV

Poglavlje I. Privredni ribolov

Član 16.

(Privredni ribolov)

- (1) Privredni ribolov može se obavljati samo u onim ribolovnim područjima/zonama u kojima je Pravilnikom iz člana 15. stav (9) ovog Zakona planirano obavljanje ove djelatnosti u skladu sa odredbama ovog Zakona i Ribolovnom osnovom.
- (2) Privredni ribolov može obavljati pravno lice i fizičko lice – obrtnik ako posjeduje dozvolu za privredni ribolov.
- (3) Fizičko lice u pravnom licu ili fizičko lice – obrtnik mora biti stručno osposobljeno za privredni ribolov.
- (4) Stručna osposobljenost lica iz stava (3) ovog člana dokazuje se uvjerenjem o položenom ribarskom ispitu.
- (5) Federalni ministar propisuje način i uslove obavljanja privrednog ribolova, količinu i vrstu ribolovnih alata i opreme, količinu i vrstu riba u ulovu, obrazac i sadržaj dozvole za privredni ribolov, te druga pitanja vezana za privredni ribolov.

Član 17.
(Dozvola za privredni ribolov)

- (1) Dozvola za privredni ribolov dodjeljuje se putem Javnog konkursa, kojeg provodi kantonalno ministarstvo.
- (2) Odluku o uslovima konkursa iz stava (1) ovog člana i visini naknade, na osnovu prijedloga kantonalnog ministra i pribavljenog mišljenja općine, donosi Vlada kantona.
- (3) Uz prijavu na konkurs lice iz člana 16. stava (2) ovog Zakona obavezno dostavlja rješenje o registraciji djelatnosti ribolova.
- (4) Na prijedlog Komisije za ribarstvo, kantonalni ministar donosi rješenje o dodjeli dozvole za privredni ribolov licu iz člana 16. stav (2) ovog Zakona, koje ponudi najpovoljnije uslove propisane konkursom, najkasnije 30 (trideset) dana od dana objavljivanja javnog konkursa.
- (5) Dozvolu za privredni ribolov izdaje kantonalno ministarstvo, najkasnije 30 (trideset) dana od dana donošenja rješenja o dodjeli dozvole.
- (6) Dozvola za privredni ribolov se izdaje na vremenski period od 5 (pet) godina.
- (7) Broj dozvola za privredni ribolov, koje se mogu izdati u jednom ribolovnom području/zoni propisuje se u skladu sa Pravilnikom iz člana 15. stav (9) ovog Zakona.
- (8) Dosadašnji korisnik dozvole za privredni ribolov ima, pod jednakim uslovima, pravo prvenstva u dodjeli dozvole.
- (9) Korisnik dozvole za privredni ribolov ne može dozvolu za privredni ribolov ustupati ili prenositi na druga lica.
- (10) Obavijest o dodjeli dozvole i kopija dozvole za privredni ribolov dostavlja se korisniku ribolovnog prava za ribolovno područje/zonu obuhvaćeno dozvolom za privredni ribolov, najkasnije 8 (osam) dana od dana njenog izdavanja.
- (11) Protiv rješenja kojim se uskraćuje dozvola za privredni ribolov može se izjaviti žalba Federalnom ministarstvu u roku od 15 (petnaest) dana od dana prijema rješenja.

Član 18.
(Ugovor o obavljanju privrednog ribolova)

- (1) Kantonalni ministar s korisnikom dozvole za privredni ribolov zaključuje ugovor o obavljanju privrednog ribolova kojim se utvrđuju: naziv ribolovnog područja/zone, veličina i granice ribolovnog područja/zone, mjesto, način i uslovi obavljanja ribolova, mjere koje se moraju preduzimati radi zaštite i očuvanja ribljeg fonda, visina i način plaćanja naknade za obavljanja ribolova, uslovi raskidanja ugovora i oduzimanja dozvole za privredni ribolov, te drugi elementi obligaciono-pravnog karaktera.
- (2) Ugovor o obavljanju privrednog ribolova zaključuje se najkasnije u roku od 30 (trideset) dana od dana izdavanja dozvole za privredni ribolov.
- (3) Korisnik dozvole za privredni ribolov obavezan je obezbijediti stručno vođenje poslova privrednog ribolova, najkasnije u vremenskom roku od 90 (devedeset) dana od dana potpisivanja ugovora.

- (4) Sredstva uplaćena za naknadu za obavljanje privrednog ribolova su namjenska sredstva kantona i općina i koriste se isključivo za poribljavanje ribolovnih voda u ribolovnom području/zoni za koje je izdata dozvola za privredni ribolov.
- (5) Poribljavanje ribolovnih voda iz stava (4) ovog člana provodi se u skladu s odredbama člana 47. ovog Zakona.

Član 19.

(Zabrana obavljanja privrednog ribolova)

- (1) Radi zaštite i očuvanja ribljeg fonda, kantonalni ministar može rješenjem privremeno ograničiti ili zabraniti obavljanje privrednog ribolova.
- (2) Rješenje o privremenom ograničenju ili zabrani privrednog ribolova izdaje kantonalno ministarstvo na osnovu zahtjeva korisnika ribolovnog prava u čijem se ribolovnom području/zoni obavlja privredni ribolov i mišljenja ovlaštene ustanove koja je izradila Ribolovnu osnovu.
- (3) Privremeno ograničenje ili zabrana obavljanja privrednog ribolova može se donijeti na vremenski period najduže od 1 (jedne) godine.
- (4) Protiv rješenja o privremenom ograničenju ili zabrani privrednog ribolova može se izjaviti žalba Federalnom ministarstvu u roku od 15 (petnaest) dana od dana prijema rješenja.

Član 20.

(Oduzimanje i prestanak važenja dozvole za privredni ribolov)

- (1) Kantonalno ministarstvo će korisniku dozvole za privredni ribolov rješenjem oduzeti dozvolu ako:
 - a) obavlja ribolov alatima i opremom za ribolov koji nisu upisani u dozvolu;
 - b) obavlja ribolov alatima i opremom koji nisu označeni na propisan način;
 - c) obavlja ribolov u količini većoj od upisane u dozvolu;
 - d) ne obezbijedi stručno vođenje poslovima privrednog ribolova u propisanom roku;
 - e) ustupi dozvolu na korištenje ili je prenese na drugo pravno ili fizičko lice;
 - f) ne provodi mjere zaštite i očuvanja ribljeg fonda;
 - g) ne plaća naknadu za obavljanje privrednog ribolova u roku određenom ugovorom iz člana 18. stav (1) ovog Zakona;
 - h) nije započeo obavljati ribolov u roku od 6 (šest) mjeseci od dana zaključivanja ugovora iz člana 18. stav (1) ovog Zakona;
 - i) ne dostavlja Savezu i kantonalnom ministarstvu Godišnji izvještaj o ulovu u privrednom ribolovu u propisanom roku ili dostavlja netačne podatke;
 - j) prilikom obavljanja ribolova ne pridržava odredbi ovog Zakona i obaveza predviđenih ugovorom iz člana 18. stav (1) ovog Zakona.
- (2) Ako utvrdi nepravilnosti iz stava (1) ovog člana, nadležni poljoprivredni inspektor pokreće postupak za oduzimanje dozvole za privredni ribolov.
- (3) Protiv rješenja o oduzimanju dozvole za privredni ribolov može se izjaviti žalba Federalnom ministarstvu u roku od 15 (petnaest) dana od dana prijema rješenja.

- (4) Obavijest o oduzimanju dozvole za privredni ribolov dostavlja se korisniku ribolovnog prava za ribolovno područje/zonu obuhvaćeno dozvolom za privredni ribolov, najkasnije 8 (osam) dana od njenog oduzimanja.
- (5) Dozvola za privredni ribolov prestaje važiti na zahtjev korisnika dozvole ili prestankom postojanja ili stečajem lica.

Član 21.
(Prava i obaveze ribara)

- (1) Korisnik dozvole za privredni ribolov smije obavljati ribolov samo na onom dijelu ribolovnog područja/zona koji je upisan u dozvolu za privredni ribolov, ribolovnim alatima i opremom koji su upisani u dozvolu na propisan način označeni i u količini upisanoj u dozvoli.
- (2) Ribar za vrijeme obavljanja ribolova mora posjedovati dozvolu kod sebe, odnosno na plovilu koje je upisano u dozvoli.
- (3) Kontrolu ulova, ribolovnih alata i opreme kojima se obavlja privredni ribolov obavlja ribočuvar korisnika ribolovnog prava u ribolovnom području/zoni za koje je izdata dozvola za privredni ribolov.
- (4) Ribar je dužan omogućiti i pružiti ribočuvaru sve potrebne podatke i obavijesti u vezi sa obavljanjem privrednog ribolova.
- (5) Korisnik dozvole za privredni ribolov obavezan je voditi evidenciju o ribolovu i ulovu **ribe** i Savezu i kantonalnom ministarstvu dostaviti Godišnji izvještaj o ulovu ribe u privrednom ribolovu.

Poglavlje II. Sportski ribolov

Član 22.
(Sportski ribolov)

- (1) Sportski ribolov može se obavljati u svim ribolovnim vodama, osim onih ribolovnih voda kojima je promjenjena namjena u skladu sa odredbama člana 13. stav (7) ovog Zakona.
- (2) Sportski ribolov može obavljati fizičko lice - sportski ribolovac (u daljem tekstu: ribolovac) koji posjeduje dozvolu za lov ribe (u daljem tekstu: ribolovnu dozvolu).
- (3) Lice iz stava (2) ovog člana mora biti stručno osposobljeno za sportski ribolov.
- (4) Stručna osposobljenost lica iz stava (3) ovog člana dokazuje se uvjerenjem o položenom ribolovačkom ispitu.
- (5) Ribe ulovljene u sportskom ribolovu i zadržane u skladu s odredbama ovoga Zakona i propisa donijetih na osnovu njega, postaju vlasništvo ribolovca i ne smiju se stavljati u promet.
- (6) Federalni ministar propisuje kategorizaciju ribolovnih dozvola, oblik i sadržaj ribolovne dozvole, te visina naknade za obavljanje sportskog ribolova, način i uslovi obavljanja sportskog ribolova, količina i vrsta ribolovnih alata i opreme, lovostaj, količina i vrste riba u ulovu, te druga pitanja vezana za sportski ribolov.

Član 23.
(Ribolovno pravo)

- (1) Riblji fondom u ribolovnim područjima ili zonama u svrhu obavljanja sportskog ribolova upravlja korisnik ribolovnog prava.
- (2) Korisnik ribolovnog prava može biti pravno lice i/ili udruženje sportskih ribolovaca (u daljem tekstu: Udruženje) koje ispunjava uslove propisane ovim Zakonom.
- (3) Iznimno odredbama stava (1) ovog člana dio ribolovnog područja/zone koji je u sastavu nacionalnog parka ili drugog zaštićenog prirodnog dobra (park prirode, rezervat, i dr.) koristi javna ustanova koja upravlja tim dobrima, u skladu s odredbama ovog Zakona i propisa donesenih na osnovu njega.
- (4) Ribolovno pravo dodjeljuje se putem Javnog konkursa kojeg provodi kantonalno ministarstvo.
- (5) Odluku o uslovima konkursa iz stava (4) ovog člana i visinu naknade na osnovu prijedloga kantonalnog ministra i pribavljenog mišljenja općine, donosi Vlada kantona.
- (6) Uz prijavu na konkurs lice iz stava (2) ovog člana obavezno dostavlja rješenje o registraciji djelatnosti ribolova ili rješenje o registraciji Udruženja i Program održivog korištenja ribolovnog područja ili zone.
- (7) Na prijedlog Komisije za ribarstvo, kantonalni ministar donosi rješenje o dodjeli ribolovnog prava licu iz stava (2) ovog člana, koje ponudi najpovoljnije uslove propisane konkursom, najkasnije 30 (trideset) dana od dana objavljivanja javnog konkursa.
- (8) Ribolovno pravo izdaje kantonalno ministarstvo, najkasnije 30 (trideset) dana od dana donošenja rješenja o dodjeli ribolovnog prava.
- (9) Ribolovno pravo se izdaje na vremenski period od 10 (deset) godina.
- (10) Dosadašnji korisnik ribolovnog prava ima, pod jednakim uslovima, pravo prvenstva u dodjeli ribolovnog prava.
- (11) Korisnik ribolovnog prava ne može ribolovno pravo ustupati ili prenositi na druga lica.
- (12) Protiv rješenja iz stava (7) ovog člana može se izjaviti žalba Federalnom ministarstvu u roku od 15 (petnaest) dana od dana prijema rješenja.
- (13) Kantonalni ministar može pod posebnim uslovima, uz prethodno pribavljeno mišljenje ovlaštene ustanove i saglasnost tijela koje upravlja vodama, ribolovnim vodama proglasiti i vode iznimno od odredbi člana 13. stav (5) tač. c) i d) ovog Zakona i dati ih na upravljanje korisniku ribolovnog područja/zone, kojima te vode pripadaju.
- (14) Kantonalno ministarstvo dužno je najkasnije u roku od 1 (jedne) godine od dana donošenja Pravilnika o ribolovnim vodama, ribolovnim područjima i katastru ribolovnih voda dodjeliti ribolovno pravo u skladu s odredbama ovog člana.
- (15) Ako kantonalno ministarstvo ne postupi u skladu sa stavom (14) ovog člana, Federalno ministarstvo će provesti postupak dodjele ribolovnog prava.

Član 24.

(Ugovor o dodjeli ribolovnog područja ili zone na korištenje)

- (1) Kantonalni ministar s korisnikom ribolovnog prava zaključuje ugovor o dodjeli ribolovnog područja ili zone na korištenje, kojim se utvrđuju: naziv ribolovnog područja/zone, veličina i granice ribolovnog područja/zone, mjesto, način i uslovi obavljanja ribolova, način korištenja i upravljanja ribolovnim područjem/zonom,

- mjere koje mora preduzimati radi zaštite ribljeg fonda i unapređenja ribarstva, visina i način plaćanja naknade za dodjelu ribolovnog područja/zone, uslovi raskidanja ugovora i oduzimanja ribolovnog prava, te drugi elementi obligaciono-pravnog karaktera.
- (2) Ugovor o dodjeli ribolovnog područja/zone na korištenje zaključuje se najkasnije u roku od 30 (trideset) dana od dana izdavanja ribolovnog prava.
 - (3) Korisnik ribolovnog prava obavezan je da u vremenskom roku od 90 (devedeset) dana od dana zaključivanja ugovora obezbijedi stručno vođenje poslova upravljanja ribolovnim područjem/zonom koje mu je dodjeljeno na korištenje.
 - (4) Stručna osposobljenost za vođenje poslova upravljanja ribolovnim područjem/zonom dokazuje se uvjerenjem o položenom stručnom ispitu za ribarstvo.
 - (5) Sredstva od naknade za korištenje ribolovnog područja/zone su namjenska sredstva kantona i općina i koriste se putem korisika ribolovnog prava za zaštitu i unapređenje ribljeg fonda u ribolovnom području/zoni za koje je izdato ribolovno pravo.
 - (6) U cilju zaštite i očuvanja ribljeg fonda, ribolovno područje/zona koje konkursom nije dodjeljeno na korištenje ili je isto oduzeto u skladu sa odredbama člana 25. ovog Zakona, kantonalno ministarstvo bez javnog konkursa i bez naknade dodjeljuje na privremeno korištenje korisniku ribolovnog prava u ribolovnom području koji ispunjava uslove propisane ovim Zakonom.
 - (7) Korisnik ribolovnog prava kojem je dodjeljeno ribolovno područje/zona iz stava (7) ovog člana na korištenje ima ista prava i obaveze kao i u ribolovnom području/zoni za koje je dobio ribolovno pravo putem javnog konkursa.
 - (8) Dodjela ribolovnog područja/zone na korištenje u smislu stava (7) ovog člana može trajati najduže 1 (jednu) godinu.
 - (9) Rješenje o dodjeli ribolovnog područja/zone iz stava (7) ovog člana mora se donijeti najkasnije 30 (trideset) dana prije isteka roka određenog akta o privremenoj dodjeli ribolovnog područja/zone na korištenje.

Član 25.

(Oduzimanje i prestanak važenja ribolovnog prava)

- (1) Kantonalno ministarstvo će korisniku ribolovnog prava rješenjem oduzeti ribolovno pravo ako:
 - a) Federalnom ministarstvu ne dostavi na usvajanje Privremeni program upravljanja ribolovnim područjem/zonom u propisanom roku;
 - b) ne obezbijedi stručno upravljanje ribolovnim područjem/zonom koje mu je dodjeljeno na korištenje u propisanom roku;
 - c) vidno ne označi granice ribolovnog područja/zone za koje je dobio ribolovno pravo u propisanom roku;
 - d) ne organizuje rad ribočuvarske službe u propisanom roku;
 - e) Federalnom ministarstvu ne dostavi na usvajanje Ribolovnu osnovu i Reviziju ribolovne osnove u propisanom roku;
 - f) Kantonalnom ministarstvu ne dostavi podatke neophodne za vođenje Katastra ribolovnih voda u propisanom roku;

- g) Kantonalnom ministarstvu ne dostavi na usvanje Godišnji program za narednu kalendarsku godinu u propisanom roku;
 - h) Kantonalnom ministarstvu ne dostavi Izvještaj o realizaciji godišnjeg programa za prethodnu godinu u propisanom roku;
 - i) ne uplati iznos naknade za dodjelu ribolovnog područja/zone za narednu kalendarsku godinu u propisanom roku;
 - j) ne provodi mjere predviđene ugovorom, Ribolovnom osnovom, Privremenim ili Godišnjim programom;
 - k) ribolovnim područjem/zonom upravlja suprotno Ribolovnoj osnovi ili Privremenim programom upravljanja;
 - l) internom odlukom ili na drugi način ribolovno pravo ustupi ili prenese na druga pravna lica ili udruženja;
 - m) ne ispunjava propisane obaveze dostavljanja podataka;
 - n) promjeni namjenu pojedine ribolovne vode, ribolovnog područja/zone bez saglasnosti kantonalnog ministarstva.
- (2) Ako utvrdi nepravilnosti iz stava (1) ovog člana, nadležni poljoprivredni inspektor pokreće postupak za oduzimanje ribolovnog prava.
- (3) Korisnik ribolovnog prava kojem je oduzeto ribolovno pravo u skladu s odredbama stava (1) ovog člana nema pravo na povrat materijalnih i novčanih sredstava koje je uložio u ribolovno područje/zonu.
- (4) U slučaju promjene namjene ribolovne vode ili njenog dijela u nekom ribolovnom području/zoni u skladu sa odredbama člana 13. stav (7) ovog Zakona kantonalni ministar će odlukom oduzeti ribolovno pravo na dijelu ribolovnog područja/zone, kojem pripada ta ribolovna voda ili njen dio.
- (5) Korisnik ribolovnog prava kojem je oduzeto ribolovno pravo u skladu s odredbama stava (4) ovog člana ima pravo od kantonalnog ministarstva potraživati povrat materijalnih i novčanih sredstava koje je uložio u dio ribolovnog područja/zone za koju mu je oduzeto ribolovno pravo.
- (6) Protiv rješenja o oduzimanju ribolovnog prava može se izjaviti žalba Federalnom ministarstvu u roku od 15 (petnaest) dana od dana prijema rješenja.
- (7) Ribolovno pravo prestaje važiti na zahtjev korisnika ribolovnog prava ili prestankom postojanja ili stečajem lica.

Član 26.

(Programi upravljanja ribolovnim područjem ili zonom)

- (1) Korisnik ribolovnog prava upravlja/koristi ribolovno područje/zonu u skladu sa Ribolovnom osnovom i Godišnjim programom ribolovnim područjem/zonom, za koje je stekao ribolovno pravo.
- (2) Do dana sticanja saglasnosti na Ribolovnu osnovu, korisnik ribolovnog prava ribolovnim područjem ili zonom upravlja na osnovu Privremenog programa upravljanja ribolovnim područjem/zonom (u daljem tekstu: Privremeni program).
- (3) Federalni ministar propisuje sadržaj programa upravljanja ribolovnim područjem ili zonom, način, uslovi izrade i provođenja programa, obrazac i sadržaj saglasnosti na programe upravljanja ribolovnim područjem ili zonom, te druga pitanja vezana za programe upravljanja.

Član 27.
(Ribolovno-privredna osnova)

- (1) Korisnik ribolovnog prava obavezan je donijeti ribolovnu osnovu najkasnije u roku od 1 (jedne) godine od dana zaključivanja ugovora iz člana 24. stav (1) ovog Zakona.
- (2) Saglasnost na Ribolovnu osnovu, nakon pribavljenog mišljenja kantonalnog ministarstva, daje Federalno ministarstvo, najkasnije u roku od 30 (trideset) dana od dana podnošenja zahtjeva.
- (3) Saglasnost na Ribolovnu osnovu daje se na vremenski period od 10 (deset) godina od dana zaključenja ugovora iz člana 24. stav (1) ovog Zakona.
- (4) Korisnik ribolovnog prava obavezan je uraditi Reviziju ribolovne osnove, najkasnije do isteka roka od 5 (pet) godina od dana izdavanja saglasnosti na Ribolovnu osnovu.
- (5) Iznimno od odredbi stava (4) ovog člana Revizija ribolovne osnove radi se vanredno u slučaju izazivanja ili nanošenja štete ribljem fondu u skladu sa odredbama člana 53. ovog Zakona.
- (6) Saglasnost na Reviziju ribolovne osnove iz stava (4) i (5) ovog člana, nakon pribavljenog mišljenja Savjetodavnog vijeća za ribarstvo i kantonalnog ministarstva, daje Federalno ministarstvo, najkasnije u roku od 30 (trideset) dana od dana podnošenja zahtjeva.
- (7) Ribolovnu osnovu i Reviziju ribolovne osnove izrađuje ovlaštena ustanova.

Član 28.
(Godišnji program upravljanja)

- (1) Korisnik ribolovnog prava obavezan je izraditi Godišnji program za koje je dobio ribolovno pravo u skladu sa Ribolovnom osnovom.
- (2) Godišnji program za sljedeću kalendarsku godinu korisnik ribolovnog prava dostavlja kantonalnom ministarstvu najkasnije do 1. decembra tekuće godine.
- (3) Saglasnost na Godišnji program daje kantonalno ministarstvo, uz predhodno pribavljeno mišljenje općine/općina, najkasnije u roku od 30 dana od dana podnošenja zahtjeva.
- (4) Podatke o izdatim saglasnostima iz stava (3) ovog člana kantonalno ministarstvo dostavlja Federalnom ministarstvu najkasnije do 31. marta tekuće godine.
- (5) Korisnik ribolovnog prava obavezan je kantonalnom ministarstvu dostaviti Izvještaj o realizaciji Godišnjeg programa za prethodnu godinu, najkasnije do 31. januara tekuće godine.
- (6) Korisnici susjednih ribolovnih područja ili ribolovnih zona koje se nalaze na istoj ribolovnoj vodi dužni su uskladiti svoje Godišnje programe.

Član 29.
(Privremeni program)

- (1) Korisnik ribolovnog prava obavezan je Federalnom ministarstvu dostaviti na usvajanje Privremeni program, najkasnije u vremenskom roku od 60 dana od dana zaključivanja ugovora iz člana 24. stav (1) ovog Zakona.

- (2) Saglasnost na Privremeni program daje Federalno ministarstvo najkasnije u roku od 30 dana od dana podnošenja zahtjeva.
- (3) Saglasnost na Privremeni program daje se na vremenski period od 1 (jedne) godine od dana zaključenja ugovora iz člana 24. stav (1) ovog Zakona.
- (1) Privremeni program izrađuje ovlaštena ustanova.

Član 30.

(Program održivog korištenja ribolovnog područja ili zone)

Program održivog korištenja ribolovnog područja ili zone definiše ciljeve, načine i pravce korištenja ribljeg fonda, mjere očuvanja, zaštite i unapređenja ribljeg fonda i ribolovnih voda, te druga pitanja vezana za ribolovno područje/zonu koje se dodjeljuje na korištenje u skladu sa odredbama člana 23. ovog Zakona.

Član 31.

(Označavanje ribolovnog područja ili zone)

- (1) Korisnik ribolovnog prava obavezan je vidno označiti granice ribolovnog područja/zone za koju je dobio ribolovno pravo najkasnije u roku od 90 dana od dana zaključenja ugovora iz člana člana 24. stav (1) ovog Zakona.
- (2) Federalni ministar propisuje načine i uslove označavanja granica ribolovnog područja/zone, posebnih staništa, ribolovnih revira i ribolovnih voda sa zabranom ribolova.

Član 32.

(Ribolovne dozvole)

- (1) Korisnik ribolovnog prava izdaje ribolovne dozvole za ribolovno područje/zonu za koje je dobio ribolovno pravo državljanima Bosne i Hercegovine koji su položili ribolovački ispit, te stranim državljanima bez položenog ribolovačkog ispita, ukoliko love ribu na osnovu dnevne ribolovne dozvole.
- (2) Strani državljanin, kojem je izdata dnevna ribolovna dozvola u skladu s odredbama stava (1) ovog člana, može obavljati sportski ribolov samo u prisustvu punoljetnog državljanina Bosne i Hercegovine koji posjeduje ribolovnu dozvolu.
- (3) Korisnik ribolovnog prava može stranom državljaninu izdati godišnju ribolovnu dozvolu samo uz predočeno Uvjerenje o položenom ribolovačkom ispitu.
- (4) Iznimno od odredbi stava (1) ovog člana, korisnik ribolovnog prava može izdati ribolovnu dozvolu fizičkim licima koja su oslobođena polaganja ribolovačkog ispita, u skladu sa odredbama Pravilnika o polaganju ispita.
- (5) Korisnik ribolovnog prava smije izdavati samo ribolovne dozvole koje su u skladu sa odredbama Pravilnika o sportskom ribolovu.
- (6) Korisnik ribolovnog prava ne smije izdati ribolovnu dozvolu za tekuću godinu ribolovcu koji nije dostavio godišnji izvještaj za prethodnu godinu.
- (7) Ribolovna dozvola koja je ovjerena od strane korisnika ribolovnog prava vrijedi samo u ribolovnom području/ zoni za koje je korisnik dobio ribolovno pravo.
- (8) Iznimno od odredbi stava (6) ovog člana ribolovna dozvola vrijedi i u ribolovnom području/zoni drugog korisnika ribolovnog prava ukoliko je korisnik ribolovnog

prava koji je izdao dozvolu zaključio ugovor o recipročnom pravu s drugim korisnikom ribolovnog prava.

- (9) Ribolovci za obavljanje sportskog ribolova na određenom ribolovnom području/zoni nabavljaju ribolovne dozvole od korisnika ribolovnog prava, uz plaćanje naknade za sportski ribolov i uz poštivanje organizacijske strukture i internih odluka korisnika ribolovnog prava.
- (10) Korisnik ribolovnog prava obavezan je ispuniti sve uslove kako bi lica koja žele nabaviti ribolovnu dozvolu mogli istu imati prije dolaska na ribolovnu vodu.
- (11) Korisnik ribolovnog prava obavezan je voditi evidenciju o ribolovu i ulovu ribe i Savezu i kantonalnom ministarstvu dostaviti Godišnji izvještaj o ulovu ribe u sportskom ribolovu.

Član 33.

(Isporuka ribolovnih dozvola)

- (1) Ribolovne dozvole za slijedeću godinu Savez isporučuje korisniku ribolovnog prava putem kantonalnog ministarstva.
- (2) Dozvole iz stava (1) ovog člana isporučuju se korisniku ribolovnog prava, koji je izmirio sve obaveze prema Savezu, najkasnije do 31. decembra tekuće godine.
- (3) Korisnik ribolovnog prava obavezan je Savezu, putem Kantonalnog ministarstva, dostaviti zahtjev za isporuku ribolovnih dozvola za slijedeću godinu, najkasnije do 1. decembra tekuće godine.
- (4) Korisnik ribolovnog prava može u tekućoj godini dostaviti Savezu zahtjev za isporuku dodatnih ribolovnih dozvola, ako se za istim ukaže potreba u skladu s odredbama stava 3. ovog člana.
- (5) Savez je dužan Korisniku ribolovnog prava isporučiti dodatne ribolovne dozvole najkasnije u vremenskom roku od 30 dana od dana podnošenja zahtjeva.
- (6) Savez je obavezan Federalnom i kantonalnom ministarstvu dostaviti Godišnji izvještaj o isporučenim dozvolama, najkasnije do 31. januara tekuće godine za prethodnu godinu.

Član 34.

(Prava i obaveze ribolovaca)

- (1) Ribolovac mora kod sebe posjedovati ribolovnu dozvolu u vrijeme obavljanja sportskog ribolova.
- (2) Lica mlađa od 14 (četrnaest) godina mogu obavljati sportski ribolov samo u prisustvu punoljetnog lica koje posjeduje ribolovnu dozvolu.
- (3) Ribolovac je dužan omogućiti obavljanje ribočuvarskog nadzora i pružiti ribočuvaru sve potrebne podatke i obavijesti u vezi sa obavljanjem sportskog ribolova.
- (4) Ribolovac smije loviti ribe samo uz upotrebu dopuštenih ribolovnih alata, opreme i mamaca.
- (5) Ribolovac smije koristiti plovilo za obavljanje sportskog ribolova na određenoj ribolovnoj vodi samo ukoliko je to dopušteno i određeno internim aktom korisnika ribolovnog prava u skladu sa ribolovnom osnovom.
- (6) Ribe koje nakon ulova ribolovac stavi u mrežu čuvaru smatraju se zadržanima.

- (7) Riba zadržana u ulovu ribolovac mora upisati u ribolovnu dozvolu, najkasnije do trenutka napuštanja mjesta ribolova.
- (8) Ribolovac je obavezan voditi evidenciju o ribolovu i ulovu ribe i korisniku ribolovnog prava dostaviti Izvještaj o godišnjem ulovu.

Član 35.
(Oduzimanje ribolovne dozvole)

- (1) Korisnik ribolovnog prava pokreće postupak oduzimanja ribolovne dozvole i do kraja godine zabranjuje obavljanje sportskog ribolova u ribolovnom području/zoni koje mu je dodjeljeno na korištenje, ribolovcu koji ne obavlja sportski ribolov u skladu sa odredbama ovog Zakona i propisa donesenih na osnovu njega.
- (2) Postupak za oduzimanje ribolovne dozvole u skladu sa odredbama stava (1) ovog člana pokreće ribočuvar, a provode tijela korisnika ribolovnog prava.

Član 36.
(Ribočuvarska služba)

- (1) Korisnik ribolovnog prava je obavezan da u skladu sa ribolovnom osnovom organizuje ribočuvarsku službu, najkasnije u vremenskom periodu od 30 (trideset) dana od dana zaključenja ugovora iz člana 24. stav (1) ovog Zakona.
- (2) Do dana sticanja saglasnosti na Ribolovnu osnovu, korisnik ribolovnog prava ribočuvarsku službu organizuje u skladu sa Privremenim programom.
- (3) Ribočuvarsku službu obavlja ribočuvar, kojeg imenuje korisnik ribolovnog prava.
- (4) Korisnik ribolovnog prava može za ribočuvara imenovati lice koje ima najmanje IV stepen stručne spreme i da je stručno osposobljeno.
- (5) Stručna osposobljenost lica iz stava (4) ovog člana dokazuje se Uvjerenjem o položenom ribočuvarskom ispitu.
- (6) Iznimno od stava (4) ovog člana ribočuvarsku službu može obavljati lice sa nizom stručnom spremom ako je obavljalo poslove ribočuvara neprekidno u vremenu od najmanje 5 (pet) godina i da je stručno osposobljeno.
- (7) Korisnik ribolovnog prava može, pored ribočuvarske službe, čuvanje ribljeg fonda organizovati i preko svojih članova kroz volonterski rad.
- (8) Federalni ministar propisuje način i uslovi obavljanja ribočuvarske službe, oblik i sadržaj obrasca legitimacije, značke i izgled uniforme ribočuvara, te druga pitanja vezana za rad ribočuvarske službe.

Poglavlje III. Privredno-sportski ribolov

Član 37.
(Privredno-sportski ribolov)

- (1) Privredno-sportski ribolov može se obavljati na tekućim ribolovnim vodama, koje malim dijelom vodotoka, s obje obale, protiče ili se cjelokupnom površinom stajaćih ribolovnih voda nalazi na privatnom posjedu.
- (2) Privredno-sportski ribolov može obavljati pravno lice ili fizičko lice - obrtnik koji posjeduje dozvolu za privredno-sportski ribolov.

- (3) Federalni ministar propisuje obrazac i sadržaj dozvole za privredno-sportski ribolov, način i uslovi obavljanja privredno-sportskog ribolova, kapacitet proizvodnje, te druga pitanja vezana za privredno-sportski ribolov.

Član 38.

(Dozvola za privredno-sportski ribolov)

- (1) Dozvolu za privredno-sportski ribolov izdaje Federalno ministarstvo, najkasnije u roku od 30 (trideset) dana od dana podnošenja zahtjeva.
- (2) Uz zahtjev za izdavanje dozvole za privredno-sportski ribolov, obavezno se dostavljaju:
- a) rješenje o registraciji za djelatnost ribolova;
 - b) tehničko-tehnološki projekat ribnjaka;
 - c) odgovarajuće dozvole i saglasnosti izdate u skladu s odredbama posebnih zakona koji se odnose na korištenje i zaštitu prirodnih resursa.
- (3) Dozvola za privredno-sportski ribolov se izdaje na vremenski period od 10 (deset) godina od dana izdavanja dozvole.
- (4) Tehničko-tehnološki projekat ribnjaka iz stava (2) ovog člana izrađuje ovlaštena ustanova.
- (5) Korisnik dozvole za privredno-sportski ribolov ne može dozvolu ustupati ili prenositi na druga lica.
- (6) Korisnik dozvole za privredno-sportski ribolov smije u ribnjaku držati samo one vrste i one količine ribe koje su upisane u dozvolu za privredno-sportski ribolov.
- (7) Alohtone vrste riba smiju se u ribnjaku držati samo uz odobrenje Federalnog ministarstva.
- (8) Korisnik dozvole za privredno-sportski ribolov obavezan je voditi evidenciju o privredno-sportskom ribolovu i Federalnom ministarstvu dostaviti Godišnji izvještaj o privredno-sportskom ribolovu.
- (9) Ako se rješenjem federalnog ministarstva uskrati pravo na dozvolu za privredno-sportski ribolov, podnosilac zahtjeva može pokrenuti upravni spor kod nadležnog suda.
- (10) U slučaju izmjene podataka na osnovu kojih je izdata dozvola za privredno-sportski ribolov korisnik dozvole je obavezan predati zahtjev za izdavanje nove dozvole.
- (11) Odredbe ovoga člana odnose se i na rakove, školjke, žabe i druge vodene organizme.

Član 39.

(Oduzimanje dozvole i prestanak važenja dozvole)

- (1) Federalno ministarstvo će korisniku dozvole za privredno-sportski ribolov rješenjem oduzeti dozvolu ako:
- a) dozvolu za privredno-sportski ribolov ustupi ili prenese na drugo pravno ili fizičko lice;
 - b) u ribnjaku drži vrste ili količine riba i drugih vodenih organizama koje nisu upisane u dozvoli za privredno-sportski ribolov;

- c) u ribnjaku drži alohtone vrsta riba i drugih vodenih organizama bez odobrenja Federalnog ministarstva;
 - d) Federalnom ministarstvu ne dostavi Godišnji izvještaj o privredno-sportskom ribolovu u propisanom roku;
 - e) se nakon izdavanja dozvole za privredno-sportski ribolov administrativnom provjerom ili inspekcijskim nadzorom utvrdi da je ista izdata na osnovu netačnih podataka;
 - f) se ne pridržava propisanih uslova zaštite ribe i prirode ili ne ispunjava uslove, odnosno obaveze propisane ovim Zakonom;
 - g) se uz novčanu kaznu za prekršaj izrekne i zaštitna mjera zabrane djelatnosti ribolova;
 - h) prestane da ispunjava ostale uslove propisane ovim Zakonom.
- (2) Ako utvrdi nepravilnosti iz stava (1) ovog člana, federalni poljoprivredni inspektor pokreće postupak za oduzimanje dozvole za privredno-sportski ribolov.
- (3) Protiv rješenja o oduzimanju dozvole za privredno-sportski ribolov nije dopuštena žalba, ali se može pokrenuti upravni spor kod nadležnog suda.
- (4) Pokretanje upravnog spora ne odgađa izvršenje rješenja.
- (5) Dozvola za privredno-sportski ribolov prestaje važiti na zahtjev korisnika dozvole ili prestankom postojanja ili stečajem lica.

Poglavlje IV. Posebni vidovi ribolova

Član 40.

(Posebni vidovi ribolova)

- (1) U ribolovnim vodama mogu se obavljati i drugi, posebni vidovi ribolova:
- a) ribolov u naučno-istraživačke svrhe;
 - b) selektivni ribolov;
 - c) sanacioni ribolov;
- (2) Ribolov iz stava (1) ovog člana, mogu obavljati ovlaštene ustanove, koje posjeduju dozvolu za obavljanje ribolova u naučno-istraživačke svrhe, selektivnog ili sanacionog ribolova.
- (3) Dozvolu za obavljanje ribolova iz stava (1) ovog člana izdaje Federalno ministarstvo, najkasnije 30 (trideset) dana od dana prijema zahtjeva.
- (4) Uz zahtjev za izdavanje dozvole za obavljanje ribolova iz stava (1) ovog člana, obavezno se dostavljaju istraživački program ili projekat ili ugovor o obavljanju naučnih i stručnih poslova u oblasti slatkovodnog ribarstva.
- (5) Dozvola za ribolov iz stava (1) ovog člana izdaje se najduže za vremenski period od 1 (jedne) kalendarske godine, s mogućnošću produžavanja iste, u toku realizacije istraživačkog programa ili trajanja ugovora o obavljanju naučnih i stručnih poslova u oblasti slatkovodnog ribarstva.
- (6) Korisnik dozvole za ribolov iz stava (1) ovog člana ne može dozvolu ustupati ili prenositi na druga lica.
- (7) Korisnik dozvole za ribolov iz stava (1) ovog člana mora imati dozvolu uz sebe prilikom obavljanja ribolova.

- (8) Korisnik dozvole za ribolov iz stava (1) ovog člana smije, pored dozvoljenih ribolovnih alata i pribora, koristiti i specijalnu opremu (elektroagregat, ehosonar, mreže, vrše, i sl.) tokom obavljanja ribolova.
- (9) Protiv rješenja o uskraćivanju dozvole za obavljanje ribolova iz stava (1) ovog člana nije dopuštena žalba, ali se može pokrenuti upravni spor kod nadležnog suda.
- (10) Pokretanje upravnog spora ne odgađa izvršenje rješenja.
- (11) Federalni ministar propisuje obrazac i sadržaj dozvole za poseban vid ribolova, način i uslovi dobijanja dozvola za ribolov u naučno-istraživačke svrhe, selektivni i sanacioni ribolov, način i uslovi obavljanja ribolova u naučno-istraživačke svrhe, selektivnog i sanacionog ribolova, te druga pitanja vezana za posebne oblike ribolova.

DIO ČETVRTI - AKVAKULTURA

Član 41. (Akvakultura)

- (1) Akvakultura se može obavljati u svim ribolovnim vodama, pod uslovom da se ne ugrožava i ne mijenja prvobitno stanje vodnog sistema i vodenih organizama.
- (2) Akvakulturu može obavljati pravno lice ili fizičko lice – obrtnik koje posjeduje dozvolu za akvakulturu.
- (3) Fizičko lice u pravnom licu ili fizičko lice – obrtnik mora biti stručno osposobljeno za obavljanje poslova u akvakulturi.
- (4) Stručna osposobljenost lica iz stava (3) dokazuje se uvjerenjem o položenom stručnom ispitu za akvakulturu.
- (5) Federalni ministar propisuje obrazac i sadržaj dozvole za akvakulturu, način i uslovi obavljanja akvakulture, kapacitet proizvodnje, te druga pitanja vezana za akvakulturu.

Poglavlje I. Dozvola za akvakulturu

Član 42. (Dozvola za akvakulturu)

- (1) Dozvolu za akvakulturu izdaje Federalno ministarstvo, najkasnije 30 (trideset) dana od dana podnošenja zahtjeva.
- (2) Uz zahtjev za izdavanje dozvole za akvakulturu obavezno se dostavljaju:
 - a) rješenje o registraciji za djelatnost akvakulture;
 - b) tehničko-tehnološki projekat ribogojilišta;
 - c) odgovarajuće dozvole i saglasnosti u skladu s odredbama ovog Zakona i drugih zakona koji se odnose na akvakulturu.
- (3) Dozvola za akvakulturu se izdaje na vremenski period od 10 godina od dana izdavanja dozvole.
- (4) Tehničko-tehnološki projekat iz stava (2) tačka b) ovog člana izrađuje ovlaštena ustanova.

- (5) Korisnik dozvole za akvakulturu ne može dozvolu ustupati ili prenositi na drugo lice.
- (6) Korisnik dozvole za akvakulturu obavezan je obezbijediti stručno vođenje poslova akvakulture, najkasnije u vremenskom roku od 6 (šest) mjeseci od dana izdavanja dozvole.
- (7) Korisnik dozvole za akvakulturu smije u ribogojilištu držati i uzgajati samo one vrste i one količine ribe koje su upisane u dozvolu za akvakulturu.
- (8) Korisnik dozvole za akvakulturu obavezan je voditi evidenciju o akvakulturi i Federalnom ministarstvu dostaviti Godišnji izvještaj o akvakulturi.
- (9) Ako se rješenjem federalnog ministarstva uskrati pravo na dozvolu za akvakulturu, podnosilac zahtjeva može pokrenuti upravni spor kod nadležnog suda.
- (10) U slučaju izmjene podataka na osnovu kojih je izdata dozvola za akvakulturu korisnik dozvole je obavezan predati zahtjev za izdavanje nove dozvole za akvakulturu.
- (11) Odredbe ovoga člana odnose se i na uzgoj rakova, školjki, žaba i drugih vodenih organizme.

Član 43.

(Odobrenje za uzgoj autohtonih i alohtonih vrsta riba)

- (1) Uzgoj autohtonih vrsta riba za poribljavanje ribolovnih voda može obavljati korisnik dozvole za akvakulturu koji posjeduje odobrenje za uzgoj autohtonih vrsta riba.
- (2) Iznimno od odredbi stava (1) ovog člana, uzgoj mlađi autohtonih vrsta riba može obavljati i korisnik ribolovnog prava, ako je to propisano ribolovnom osnovom.
- (3) Uvoz alohtonih vrsta riba i oplodene ikre kao i uzgoj može obavljati korisnik dozvole za akvakulturu koji posjeduje odobrenje za uvoz i uzgoj alohtonih vrsta riba.
- (4) Odobrenje za uzgoj riba u skladu s odredbama st. (1), (2) i (3) ovog člana, izdaje Federalno ministarstvo, najkasnije u vremenskom roku 30 (trideset) dana od dana podnošenja zahtjeva.
- (5) Uz zahtjev za izdavanje odobrenja za uzgoj riba iz stava (4) ovog člana obavezno se dostavljaju Uzgojni program i ugovor o monitoringu Uzgojnog programa.
- (6) Odobrenja za uzgoj riba iz stava (4) ovog člana se izdaje na vremenski period od 5 (pet) godina od dana izdavanja odobrenja.
- (7) Uzgojni program izrađuje ovlaštena ustanova.
- (8) Korisnik odobrenja za uzgoj riba iz stava (4) ovog člana ne može odobrenje ustupati ili prenositi na drugo lice.
- (9) Korisnik odobrenja za uzgoj riba iz stava (4) ovog člana smije u ribogojilištu držati samo one vrste ribe koje su upisane u odobrenje.
- (10) Korisnik ribolovnog prava smije uzgajati mlađ samo onih vrsta riba koje žive u ribolovnim vodama za koje je dobio ribolovno pravo.
- (11) Ako se rješenjem Federalnog ministarstva uskrati pravo na odobrenje za uzgoj riba iz stava (4) ovog člana, podnosilac zahtjeva može pokrenuti upravni spor kod nadležnog suda.
- (12) Odredbe ovoga člana odnose se i na rakove, školjke, žabe i druge vodene organizme.

Član 44.

(Oduzimanje i prestanak važenja dozvole za akvakulturu)

- (1) Federalno ministarstvo će korisniku dozvole rješenjem oduzeti dozvolu za akvakulturu ako:
 - a) dozvolu ustupi ili prenese na drugo lice ili omogući da drugo lice obavlja djelatnost akvakulture na osnovu izdate dozvole;
 - b) ne obezbijedi stručno vođenje poslovima akvakulture u propisanom roku;
 - c) uzgaja vrste ili količine riba koje nisu upisane u dozvoli za akvakulturu;
 - d) obavlja akvakulturu na način i pod uslovima koji nisu u skladu sa ovim Zakonom i propisima donijetim na osnovu njega;
 - e) Federalnom ministarstvu ne dostavi Godišnji izvještaj o akvakulturi u propisanom roku;
 - f) se nakon izdavanja dozvole za akvakulturu administrativnom provjerom ili inspekcijskim nadzorom utvrdi da je ista izdata na osnovu netačnih podataka;
 - g) se ne pridržava propisanih uslova zaštite ribe i prirode ili ne ispunjava uslove, odnosno obaveze propisane ovim Zakonom, ugovorom ili ne gazduje u skladu sa ribarskom osnovom;
 - h) se uz novčanu kaznu za prekršaj izrekne i zaštitna mjera zabrane djelatnosti uzgoja;
 - i) prestane da ispunjava ostale uslove propisane ovim Zakonom.
- (2) Ako utvrdi nepravilnosti iz stava (1) ovog člana, postupak za oduzimanje dozvole za akvakulturu pokreće federalni poljoprivredni inspektor.
- (3) Protiv rješenja o oduzimanju dozvole za akvakulturu nije dopuštena žalba, ali se može pokrenuti upravni spor kod nadležnog suda.
- (4) Pokretanje upravnog spora ne odgađa izvršenje rješenja.

Član 45.

(Prestanak važenja dozvole za akvakulturu)

Dozvola za akvakulturu prestaje važiti:

- a) prestankom važenja odgovarajuće dozvole i saglasnosti u skladu s odredbama ovog Zakona i drugih propisa koji se odnose na akvakulturu;
- b) oduzimanjem odgovarajuće dozvole i saglasnosti u skladu s odredbama ovog Zakona i drugih propisa koji se odnose na akvakulturu;
- c) prestankom postojanja pravnog lica i fizičke osobe-obrtnika;
- d) prestankom obavljanja djelatnosti akvakulture;
- e) na zahtjev korisnika dozvole.

DIO PETI - ZAŠTITA, OČUVANJE I UNAPRIJEĐENJE RIBLJEG FONDA

Poglavlje I. Poribljavanje i premještanje ribe

Član 46.

(Zaštita, očuvanje i unaprjeđenje ribljeg fonda)

- (1) Radi zaštite, očuvanja i unaprjeđenja ribljeg fonda Federalni ministar propisuje obrazac i sadržaj saglasnosti o proglašenju posebnog staništa, posebne ribolovne staze i ribolovne vode sa zabranom ribolova, poribljavanje ribolovnih voda, premještanja ribljeg fonda, način i uslovi formiranja i korištenja posebnih staništa, posebnih ribolovnih staza i ribolovnih voda sa, zabranom ribolova, te druga pitanja u vezi sa zaštitom, očuvanjem i unaprjeđenjem ribljeg fonda.
- (2) U slučaju narušene prirodne ravnoteže u ribolovnim vodama, nastale pod utjecajem prirodnih ili drugih pojava, federalni ministar će propisom iz stava (1) ovog člana utvrditi posebne mjere.

Član 47.

(Poribljavanje ribolovnih voda)

- (1) Korisnik ribolovnog prava obavezan je poribljavati ribolovne vode.
- (2) Poribljavanje ribolovnih voda provodi se u cilju očuvanja brojnosti autohtonih populacija riba i ukupne ihtipopulacije u ribolovnim vodama, a da se pri tome ne ugrozi ekološka ravnoteža ostalih vodenih organizama.
- (3) Poslove poribljavanja ribolovnih voda obavlja korisnik ribolovnog prava u ribolovnom području/zoni za koje je dobio ribolovno pravo, u skladu s Ribolovnom osnovom i programom revitalizacije.
- (4) Ribolovne vode mogu se poribljavati samo autohtonim vrstama riba, utvrđenih genetskih karakteristika.
- (5) Ribolovne vode smiju se poribljavati ribom svih uzrasnih kategorija ili oplodnom ikrom, koja potječe iz ribogojilišta koje posjeduje odobrenje za uzgoj autohtonih vrsta riba, i zdravom ribom u skladu sa odredbama Zakona o veterinarstvu.
- (6) Radi zaštite ribe, riblje mlađi i ikre, unijetih u ribolovnu vodu kroz poribljavanje, korisnik ribolovnog prava dužan je uvesti zabranu ribolova u poribljenom području u trajanju od najmanje 15 (petnaest) dana nakon poribljavanja.
- (7) Troškove nabavke ribe i organizacije poribljavanja ribolovnih voda snosi korisnik ribolovnog prava.
- (8) Poribljavanje ribolovnih voda se obavlja isključivo u prisustvu Komisije za ribarstvo i stručno osposobljene osobe korisnika ribolovnog prava.
- (9) Nadzor nad poribljavanjem obavljaju kantonalni poljoprivredni i veterinarski inspektori.
- (10) Korisnik ribolovnog prava obavezan je kantonalnom ministarstvu dostaviti Izvještaj o poribljavanju ribolovnog područja/zone, najkasnije do 31. decembra tekuće godine.
- (11) Kantonalno ministarstvo obavezno je dostaviti Federalnom ministarstvu Godišnji izvještaj poribljavanja ribolovnih voda, najkasnije do 28. februara tekuće godine za prethodnu godinu.

Član 48.
(Premještanje ribljeg fonda u cilju njegove zaštite)

- (1) U slučaju trajnog narušavanja fizičkih, hemijskih ili bioloških osobina ribolovnih voda ili ako postoji opravdana sumnja da će do takvih promjena doći, korisnik ribolovnog prava obavezan je preduzeti mjere premještanja ribljeg fonda u druge ribolovne vode.
- (2) U slučaju elementarnih nepogoda (poplava, suša, i sl.) korisnik ribolovnog prava obavezan je preduzeti mjere čuvanja, spašavanja i premještanja ribe.
- (3) Odobrenje za premještanje ribljeg fonda u skladu s odredbama st. (1) i (2) ovog člana, na osnovu zahtjeva korisnika ribolovnog prava, izdaje Federalno ministarstvo, najkasnije u vremenskom roku od 3 (tri) dana od dana prijema zahtjeva.
- (4) U svim drugim slučajevima premještanja ribljeg fonda, korisnik ribolovnog prava uz zahtjev obavezno dostavlja i Program premještanja ribljeg fonda.
- (5) Odobrenje za premještanje ribljeg fonda u skladu s odredbama stava (4) ovog člana, izdaje Federalno ministarstvo, najkasnije 30 (trideset) dana od dana prijema zahtjeva.
- (6) Program premještanja ribljeg fonda izrađuje ovlaštena ustanova.
- (7) Premještanje ribljeg fonda u skladu s odredbama st. (1), (2) i (4) ovog člana obavlja korisnik ribolovnog prava, uz stručnu i tehničku pomoć ovlaštene ustanove.
- (8) Ovlaštena ustanova i korisnik ribolovnog prava dužni su sačiniti izvještaj o obavljenom premještanju i dostaviti ga Federalnom ministarstvu, najkasnije 30 (trideset) dana od dana premještanja ribljeg fonda.
- (9) U slučaju planiranog ispuštanja akumulacija, vlasnik ili korisnik akumulacije obavezan je napraviti elaborat o spašavanju ribljeg fonda, te korisniku ribolovnog prava nadoknaditi štetu pričinjenu ribljem fondu u skladu s odredbama člana 53. st. (3), (4), (5), (6) i (7) ovog Zakona.

Poglavlje II. Posebna staništa i ribolovne vode sa posebnim režimom ribolova

Član 49.
(Posebna staništa - Rezervati)

- (1) Korisnik ribolovnog prava može pojedine ribolovne vode ili njihove dijelove organizovati kao posebno stanište (rezervat) u skladu sa ribolovnom osnovom.
- (2) Posebnim staništima smatraju se:
 - a) riblja plodišta (prirodna riblja mrijestilišta);
 - b) uzgojni potoci (riblja rastilišta);
 - c) zimovališta;
 - d) migratorni putevi riba.
- (3) Saglasnost o proglašenju posebnog staništa, na osnovu zahtjeva korisnika ribolovnog prava izdaje Federalni ministar, najkasnije 30 (trideset) dana od dana podnošenja zahtjeva.

- (4) Korisnik ribolovnog prava obavezan je vidno označiti granice posebnog staništa, najkasnije u roku od 30 (trideset) dana od dana donošenja odluke o proglašenju posebnog staništa.
- (5) U posebnom staništu trajno je zabranjen ribolov.
- (6) Iznimno odredbama stava (5) ovog člana, Federalni ministar može odobriti obavljanje naučnog, sanacionog i selektivnog ribolova, ukoliko su ispunjeni drugi uslovi u skladu s odredbama ovog Zakona i propisa donesenih na osnovu njega.
- (7) U posebnom staništu zabranjeno je vaditi šljunak, pijesak, kamen, panjeve i bilo koje druge materijale, koristiti čamac ili druga plovila, zahvatati ili crpiti vodu, odlagati i deponovati bilo kakav materijal, prati vozila, kupati se i kupati stoku i kućne ljubimce, te vršiti druge radnje i zahvate i provoditi aktivnosti koje plaše ili ometaju ribe.
- (8) U toku sezone mrijesta u posebnim staništima zabranjeno je vršiti i druge radnje i zahvate i provoditi aktivnosti koje ometaju migraciju i mrijest riba.
- (9) Iznimno odredbama stava (7) ovog člana, osim u toku sezone mrijesta, u posebnim staništima mogu se provoditi aktivnosti u skladu s odredbama člana 85. Zakona o vodama, radi smanjenja ili sprečavanja ugroženosti ljudi i materijalnih dobara od štetnog djelovanja voda (poplave, bujice, erozije i sl.) i otklanjanje posljedica njihovog djelovanja.
- (10) Saglasnost za provođenje aktivnosti u skladu sa odredbama stava (9) ovog člana daje Federalni ministar.
- (11) U skladu sa odredbama stava (7) i (9) ovog člana, tijela nadležna za upravljanje vodama dužna su, prije početka bilo kakvih aktivnosti u posebnom staništu, upoznati korisnika ribolovnog prava sa planiranim aktivnostima, kako bi isti mogao pravovremeno preduzeti mjere zaštite ribljeg fonda od tih aktivnosti.

Član 50.

(Posebne ribolovne staze)

- (1) Korisnik ribolovnog prava može pojedine ribolovne vode ili njihove dijelove organizovati kao posebne ribolovne staze u skladu sa Ribolovnom osnovom.
- (2) Posebnim ribolovnim stazama smatraju se:
 - a) ribolovni reviri;
 - b) mušičarske staze;
 - c) šaranaške staze;
 - d) druge specijalizovane staze;
- (3) Saglasnost o proglašenju posebne ribolovne staze, na osnovu zahtjeva korisnika ribolovnog prava izdaje Federalno ministarstvo, najkasnije 30 (trideset) dana od dana podnošenja zahtjeva.
- (4) Korisnik ribolovnog prava obavezan je vidno označiti granice posebne ribolovne staze, najkasnije u roku od 30 (trideset) dana od dana donošenja odluke o proglašenju posebne ribolovne staze.
- (5) U posebnoj ribolovnoj stazi dozvoljen je sportski ribolov po posebnom ribolovnom režimu.
- (6) Režim ribolova u posebnoj ribolovnoj stazi određuje korisnik ribolovnog prava internim aktima, u skladu sa ribarskom osnovom.

- (7) U posebnim ribolovnim stazama zabranjeno je vaditi šljunak, pijesak, kamen, panjeve i bilo koje druge materijale, koristiti čamac ili druga plovila, zahvatati ili crpiti vodu, odlagati i deponovati bilo kakav materijal, prati vozila, kupati se, kupati stoku i kućne ljubimce, te vršiti druge radnje i zahvate i provoditi aktivnosti koje plaše ili ometaju ribe.
- (8) Iznimno odredbama stava (7) ovog člana, osim u vrijeme lovostaja, u posebnim ribolovnim stazama mogu se provoditi aktivnosti u skladu s odredbama člana 85. Zakona o vodama, radi smanjenja ili sprečavanja ugroženosti ljudi i materijalnih dobara od štetnog djelovanja voda (poplave, bujice, erozije i sl.) i otklanjanje posljedica njihovog djelovanja.
- (9) Saglasnost za provođenje aktivnosti u skladu sa odredbama stava (8) ovog člana daje Federalni ministar.
- (10) U skladu sa odredbama stava (7) i (8) ovog člana, tijela nadležna za upravljanje vodama dužna su, prije početka bilo kakvih aktivnosti u posebnoj ribolovnoj stazi, upoznati korisnika ribolovnog prava sa planiranim aktivnostima, kako bi isti mogao pravovremeno preduzeti mjere zaštite ribljeg fonda od tih aktivnosti.

Član 51.

(Ribolovna voda sa zabranom ribolova)

- (1) U cilju obnove ribljeg fonda, korisnik ribolovnog prava može u pojedinim ribolovnim vodama ili njihovim dijelovima odrediti privremenu ili trajnu zabranu ribolova ukoliko je to predviđeno ribolovnom osnovom.
- (2) Saglasnost o proglašenju ribolovne vode sa zabranom ribolova, na osnovu zahtjeva korisnika ribolovnog prava izdaje Federalno ministarstvo, najkasnije 30 (trideset) dana od dana podnošenja zahtjeva.
- (3) Korisnik ribolovnog prava obavezan je vidno označiti granice ribolovne vode sa zabranom ribolova, najkasnije u roku od 30 (trideset) dana od dana izdavanja Odluke o proglašenju ribolovne vode sa zabranom ribolova.
- (4) Iznimno odredbama stava (1) ovog člana, Federalni ministar može odobriti obavljanje naučnog, sanacionog i selektivnog ribolova, ukoliko su ispunjeni drugi uslovi u skladu s odredbama ovog Zakona i propisa donesenih na osnovu njega.
- (5) U ribolovnim vodama sa zabranom ribolova zabranjeno je vaditi šljunak, pijesak, kamen, panjeve i bilo koje druge materijale, koristiti čamac ili druga plovila, zahvatati ili crpiti vodu, odlagati i deponovati bilo kakav materijal, prati vozila, kupati se, kupati stoku i kućne ljubimce, te vršiti druge radnje i zahvate i provoditi aktivnosti koje plaše ili ometaju ribe.
- (6) Iznimno odredbama stava (5) ovog člana, osim u toku sezone mrijesta, u ribolovnoj vodi sa zabranom ribolova mogu se provoditi aktivnosti u skladu s odredbama člana 85. Zakona o vodama, radi smanjenja ili sprečavanja ugroženosti ljudi i materijalnih dobara od štetnog djelovanja voda (poplave, bujice, erozije i sl.) i otklanjanje posljedica njihovog djelovanja.
- (7) Saglasnost za provođenje aktivnosti u skladu sa odredbama stava (5) ovog člana daje Federalni ministar.
- (8) U skladu sa odredbama stava (5) i (6) ovog člana, tijela nadležna za upravljanje vodama dužna su, prije početka bilo kakvih aktivnosti u ribolovnoj vodi sa zabranom ribolova, upoznati korisnika ribolovnog prava sa planiranim

aktivnostima, kako bi isti mogao pravovremeno preduzeti mjere zaštite ribljeg fonda od tih aktivnosti.

Poglavlje III. Zabrane ribolova

Član 52. (Zabrane ribolova)

(1) Zabranjeno je:

- a) loviti ribu bez ribolovne dozvole ili važeće ribolovne dozvole;
- b) loviti ribu u posebnim staništima i ribolovnim vodama sa zabranom ribolova;
- c) za vrijeme lovostaja loviti i zadržavati ribu neposredno nakon ostvarivanja ulova u sportskom ribolovu, loviti i zadržavati ribu nakon ulova, odnosno sortiranja na plovilu ili kopnu u privrednom ribolovu, prevoziti, skladištiti, prerađivati, izlagati, prodavati, stavljati u promet ribu;
- d) ispod minimalne i maksimalne propisane veličine loviti i zadržavati ribu neposredno nakon ostvarivanja ulova u sportskom ribolovu, loviti i zadržavati ribu nakon ulova odnosno sortiranja na plovilu ili kopnu u privrednom ribolovu, prevoziti, skladištiti, prerađivati, izlagati, prodavati, stavljati u promet ribu;
- e) ribu ulovljenu u sportskom ribolovu stavljati u promet;
- f) loviti ribu s mosta i objekata koji se nalaze na ili iznad vodene površine i koji nisu udaljeni više od 2 metra od obale;
- g) loviti ribu iz plovila kod obavljanja sportskog ribolova, osim ukoliko to nije određeno i dopušteno internim aktom korisnika ribolovnog prava u skladu sa ribolovnom osnovom;
- h) loviti ribu u depresijama, barama, poplavljenim površinama i drugim vodenim površinama koje nastaju povlačenjem vode;
- i) loviti ribu u ribolovnim vodama uz upotrebu strane riblje vrste (žive ili mrtve) kao mamca;
- j) loviti ribu s više ribolovnih alata ili opreme nego što je dozvoljeno odredbama ovog Zakona i propisima donesenim na osnovu njega;
- k) loviti ribu podvodnom puškom, ostima, harpunima i drugim nedopuštenim alatima i priborom;
- l) loviti ribu mrežama, vršama, parangalima ili drugim profesionalnim ribarskim alatima i priborom, osim na vodama gdje je upotreba tih alata i sredstava dozvoljena za obavljanje privrednog ribolova u skladu sa odredbama ovog Zakona i obavljanja ribolova u skladu s odredbama člana 40. ovog Zakona;
- m) loviti ribu strujom visokog napona ili agregatima za elektroribolov, osim obavljanja ribolova u skladu s odredbama člana 40. ovog Zakona;
- n) u ribolovu koristiti ehosonar i druge elektronske uređaje, osim obavljanja ribolova u skladu s odredbama člana 40. ovog Zakona;
- o) loviti ribu noću, osim ukoliko to nije određeno i dopušteno internim aktom korisnika ribolovnog prava u skladu sa ribolovnom osnovom;

- p) loviti ribu eksplozivnim ili hemijskim sredstvima koja ih ubijaju, truju ili omamljuju;
 - q) na bilo koji način sprječavati povratak riba s poplavljenog područja u vodotoke, loviti ribu sredstvima koja sprječavaju povratak riba s poplavljenog područja te sprječavati bilo koja druga migratorna kretanja riba;
 - r) loviti ribu u virovima, barama, rukavcima, i dr. koji su zbog niskog vodostaja odvojeni od glavnog vodotoka ili kroz njih ne teče vodotok.
 - s) loviti ribu direktno rukom, povlačenjem i kaćanjem udicom s vanjske strane tijela ribe;
 - t) loviti ribu unutar ograđenog prostora hidroenergetskog objekta, te 100 metara uzvodno i nizvodno od ograde hidroenergetskog objekta;
 - u) loviti ribu 100 metara uzvodno i nizvodno od ograde objekata akvakulture;
 - v) provoditi ribolov radi obavljanja naučnih i stručnih poslova u oblasti slatkovodnog ribarstva bez odgovarajućeg ovlaštenja;
 - w) obavljati ribolov u naučno-istraživačke svrhe, selektivni i sanacioni ribolov bez odgovarajuće dozvole;
 - x) poribljavati ribolovne vode ili premještati ribe suprotno odredbama ovog Zakona i propisima donijetim na osnovu njega;
 - y) ometati postavljanje znakova ili skidati znakove kojima se označava ribolovno područje/zona, posebno stanište, posebne ribolovne staze i ribolovne vode sa zabranom ribolova;
 - z) na ribolovnoj vodi ili neposredno uz nju nositi ili posjedovati u vozilu ili plovilu otrovne, nagrizajuće ili omamljujuće materije, eksplozivna sredstva, materije koje u kombinaciji s drugim materijama mogu proizvesti eksploziju, mreže, vrše, parangale podvodne puške, osti, harpune, uređaje za ribolov električnom strujom ili druga nedopuštena sredstva;
 - aa) uz ribolovnu vodu ili u plovilu ostavljati ribolovni alat ili opremu ili ulov bez nadzora i osiguranja vlasnika istoga;
 - bb) prati vozila, kupati stoku i kućne ljubimce u ribolovnoj vodi uz upotrebu štetnih i opasnih sredstava.
- (2) Odredbe stava (1) tač. b) i c) ovog člana ne odnose se na ribe iz akvakulture.

Poglavlje IV. Nadoknada štete prčinjene ribljem fondu i program revitalizacije

Član 53.

(Nadoknada štete prčinjene ribljem fondu)

- (1) Pravno, fizičko i svako drugo lice, koje svojim aktivnostima u ribolovnoj vodi ili u području ribolovne vode dovede do promjena životnih uslova u ribolovnoj vodi i naruši zdravlje ili ugrozi život riba, odnosno izazove ili pričini štetu ribljem fondu dužno je korisniku ribolovnog prava nadoknaditi štetu, najkasnije u roku od (1) jedne godine od dana utvrđivanja štete.

- (2) Korisnik ribolovnog prava ima pravo na nadoknadu štete na cijelom toku ribolovne vode, nizvodno od mjesta provođenja aktivnosti kojom je pričinjena šteta ribljem fondu.
- (3) Štetu pričinjenu ribljem fondu u ribolovnoj vodi konstatuje nadležni poljoprivedni inspektor.
- (4) Postojanje i obim štete pričinjene ribljem fondu u skladu sa odredbama stava (1) ovog člana utvrđuje se na osnovu Revizije ribolovne osnove za ribolovne vode na kojima je pričinjena šteta u skladu s odredbama člana 27. st. (5) i (6) ovog Zakona.
- (5) Na zahtjev korisnika ribolovnog prava, Reviziju ribolovne osnove u skladu sa odredbama stava (3) ovog člana izrađuje ovlaštena ustanova.
- (6) Troškove izrade revizije ribolovne osnove snosi lice koje je izazvalo ili pričinilo štetu ribljem fondu.
- (7) Visina štete pričinjene ribljem fondu u skladu s odredbama st. (1) i (2) ovog člana određuju se na osnovu odštetnog cjenovnika koji će biti određen propisom iz stava (9) ovog člana.
- (8) Novčana sredstva ostvarena na osnovu nadoknade štete pričinjene ribljem fondu prihod su korisnika ribolovnog prava i mogu se koristiti isključivo za otklanjanje i sanaciju nastale štete.
- (9) Federalni ministar propisuje način, uslove postojanja, metodologija utvrđivanja štete i visina štete, odštetni cjenovnik, način i uslovi odklanjanja štete i stvaranja uslova u ribolovnoj vodi prije nanošenja štete, Program revitalizacije, te druga pitanja vezana za štetu pričinjenu ribljem fondu.
- (10) Odredbe ovoga člana odnose se i na rakove, školjke, žabe i druge vodene organizme.
- (11) Odredbe ovoga člana odnose se i na nezakonit ulov ribe u skladu s odredbama člana 52. ovog Zakona ili bilo koje druge aktivnosti suprotno odredbama ovog Zakona i propisa donesenim na osnovu njega.

Član 54.

(Pregrađivanje ribolovnih voda i riblje staze)

- (1) Vodotok u ribolovnoj vodi ne smije se pregrađivati.
- (2) Iznimno od stava (1) ovog člana, na vodotoku može biti izgrađena privremena ili stalna pregrada (u daljem tekstu: brana) samo na osnovu odgovarajuće dozvole i saglasnosti u skladu s odredbama Zakona o vodama i propisa donesenih na osnovu njega.
- (3) Izgradnjom brane u skladu s odredbama stava (2) ovog člana ne smije se spriječavati slobodan prolaz - migracija riba.
- (4) Slobodan i kontinuiran prolaz riba ostvaruje se projektovanjem i izgradnjom migracionog puta za ribe (u daljem tekstu: riblja staza).
- (5) Korisnik postojeće brane, koja spriječava slobodan i kontinuiran prolaz riba, dužan je izgraditi riblju stazu, najkasnije u vremenskom roku od 2 (dvije) godine od dana objavljivanja ovog Zakona.
- (6) Riblja staza mora postojati i biti u funkciji od dana pripremnih radova i početka izgradnje do dana prestanka rada brane.

- (7) Po prestanku rada brane, brana mora biti odstranjena sa ribolovne vode a ribolovna voda dovedena u stanje od prije izgradnje brane, najkasnije u vremenskom roku od 1 (jedne) godine.
- (8) Ako korisnik brane iz stava (5) ili korisnik brane iz stava (2) ovog člana ne izgradi riblju stazu, obavezan je korisnikcma ribolovnog prava nadoknaditi štetu pričinjenu ribljem fondu na cijelom toku ribolovne vode koja je pregrađena, u skladu s odredbama člana 52. st. (3), (4), (5), (6), (7) i (8) ovog Zakona.
- (9) Nadoknada štete u skladu s odredbama stava (8) ovog člana izmiruje se korisniku ribolovnog prava trajno svake godine, sve dok se ne ispune uslovi u skladu s odredbama st. (6) i (7) ovog člana.
- (10) Korisnik brane obavezan je korisniku ribolovnog prava omogućiti slobodan pristup ribljaj stazi i da ukloni eventualane nepravilnosti u radu staze ako ih korisnik ribolovnog prava uoči.
- (11) Korisnici dovodnih, odvodnih, turbinskih i drugih kanala obavezni su posjedovati i održavati u funkciji uređaje koji onemogućavaju ulazak ribe iz ribolovnih voda u te kanale.
- (12) Odredbe ovog člana odnose se i na sve druge objekte i postrojenja na ribolovnoj vodi, koji su izgrađeni u skladu s odredbama Zakona o vodama a koji spriječavaju slobodan prolaz riba.

Član 55. **(Radovi na ribolovnoj vodi)**

- (1) U ribolovnoj vodi i priobalnom pojasu ribolovne vode ne smiju se izvoditi građevinski ili bilo koji drugi radovi.
- (2) Iznimno od stava (1) ovog člana izgradnja novih ili rekonstrukcija postojećih objekata u vodoprivredi, građevinarstvu, šumarstvu i rudarstvu može se vršiti samo na osnovu odgovarajuće dozvole i saglasnosti u skladu s odredbama Zakona o vodama i propisa donesenih na osnovu njega.
- (3) Obavljanjem radova u skladu s odredbama stava (2) ovog člana ne smije se uznemiravati i činiti šteta ribljem fondu, te spiječavati slobodna migracija riba.
- (4) U skladu s odredbama stava (2) ovog člana, izgradnja mosta na ribolovnoj vodi mora obezbijediti normalan protok vode i slobodnu migraciju riba.
- (5) Ribolovna voda i njeno korito ne smije se koristiti kao saobraćajnica za mehanizaciju ili plovni put za predmete privrednih djelatnosti iz stava (2) ovog člana.
- (6) Direktno ili indirektno mućenje ribolovne vode nastalo izvođenjem radova u skladu s odredbama st. (2) i (4) ovog člana, ne smije trajati duže od 48 sati u vremenskom roku od 10 (deset) dana.
- (7) U vrijeme lovostaja zabranjeno je uzrokovati bilo kakvo mućenje ribolovnih voda.
- (8) Pravno, fizičko i svako drugo lice, koje svojim aktivnostima izazove ili pričini štetu ribljem fondu u skladu s odredbama ovog člana dužno je korisniku ribolovnog prava nadoknaditi štetu.
- (9) Šteta pričinjena ribljem fondu u skladu s odredbama stava (9) ovog člana nadoknađuje se u skladu s odredbama člana 53. st. (3), (4), (5), (6), (7) i (8). ovog Zakona.

- (10) Pravno, fizičko i svako drugo lice, koje izvodi radove u ribolovnoj vodi i priobalnom pojasu ribolovne vode u skladu s odredbama Zakona o vodama, obavezno su, prije provođenja istih upoznati korisnika ribolovnog prava, najkasnije 30 (trideset) dana prije početka radova.
- (11) Odredbe ovoga člana odnose se i na radove na ribolovnoj vodi svih drugih privrednih djelatnosti.

Član 56.

(Organizovani prijevoz putnika plovilima na ribolovnoj vodi)

- (1) Fizičko, pravno i svako drugo lice koje obavlja djelatnost organizovanog prijevoza putnika plovilima (brodovi, splavovi, čamci, rafting čamci, kajaci i sl.) dužno je korisniku ribolovnog prava nadoknaditi štetu pričinjenu ribljem fondu i štetu za ometanje u obavljanju sportskog ribolova.
- (2) Šteta pričinjena ribljem fondu u skladu s odredbama stava (1) ovog člana nadoknađuje se u skladu s odredbama člana 53. st. (3), (4), (5), (6), (7) i (8) ovog Zakona.
- (3) Nadoknada štete u skladu s odredbama stava (2) ovog člana izmiruje se korisniku ribolovnog prava trajno svake godine, sve dok lice iz stava (1) ovog člana obavlja svoju djelatnost.

Član 57.

(Program revitalizacije životnih zajednica)

- (1) Pravno, fizičko, i svako drugo lice, koje svojim aktivnostima u skladu sa odredbama čl. 53., 54. i 55. ovog Zakona, onemoguću slobodan i kontinuiran prolaz riba ili izaziva ili pričinjava štetu ribljem fondu u vremenskom roku dužem od 2 (dvije) godine ili trajno, obavezno je korisniku ribolovnog prava nadoknaditi štetu na osnovu Programa revitalizacije životnih zajednica (u daljem tekstu: Program revitalizacije), u skladu sa odredbama člana 53. ovog Zakona.
- (2) Program revitalizacije donosi korisnik ribolovnog prava, najkasnije u vremenskom roku od (1) jedne godine od dana donošenja ovog Zakona.
- (3) Saglasnost na Program revitalizacije daje Federalno ministarstvo, najkasnije u roku od 30 (trideset) dana od dana podnošenja zahtjeva.
- (4) Saglasnost na Program revitalizacije daje se na vremenski period od 10 (deset) godina od dana izdavanja saglasnosti.
- (5) Korisnik ribolovnog prava obavezan je uraditi Reviziju programa revitalizacije, najkasnije do isteka roka od 5 (pet) godina od dana izdavanja saglasnosti na program revitalizacije.
- (6) Saglasnost na Reviziju programa revitalizacije, daje Federalno ministarstvo, najkasnije u roku od 30 (trideset) dana od dana podnošenja zahtjeva.
- (7) Program revitalizacije i Reviziju programa revitalizacije izrađuje ovlaštena ustanova.

- (8) Troškove izrade Programa revitalizacije i Revizije programa revitalizacije snosi lice iz stava (1) ovog člana.
- (9) Troškove nabavke ribe, organizacije i realizacije poribljavanja ribolovnih voda snosi fizičko ili pravno lice koje svojom aktivnošću izaziva ili nanosi štetu ribljem fondu u skladu sa odredbama člana 53. ovog Zakona.
- (10) Po prestanku uslova koji su doveli do donošenja Programa revitalizacije u skladu sa stavom (1) ovog člana, isti će biti stavljen van snage rješenjem o prestanku važenja.
- (11) Rješenje o prestanku donošenja programa revitalizacije donosi federalni ministar.

Poglavlje V. Pomor ribe

Član 58. (Pomor ribe)

- (1) Pomor ribe može nastati kao posljedica prirodne, okolišne ili elementarne nesreće ili neke aktivnosti koja nije u skladu s odredbama ovog Zakona i propisa donesenih na osnovu njega, te drugih Zakona.
- (2) Korisnik ribolovnog prava obavezan je federalnom i kantonalnom poljoprivrednom inspektoratu, kao i svim drugim nadležnim službama, prijaviti svaki pomor ribe u ribolovnom području/zoni za koje je dobio ribolovno pravo.
- (3) Prijava iz stava (2) ovog člana odnosi se i na svaku promjenu ponašanja riba, promjenu fizičkih, hemijskih i bioloških osobina ribolovne vode, onečišćenje vode ili vodenog okoliša ili na saznanje o potencijalnom onečišćenju.
- (4) Uslovi i postupak prijave pomora ribe, aktivnosti koje se moraju provesti u slučaju pomora ribe i način uzimanja i čuvanja uzoraka vode, sedimenta i uginulih riba biće provode se u skladu sa ovim Zakonom i propisima donesenih na osnovu njega i odredbama drugih zakona.

DIO ŠESTI - VOĐENJE EVIDENCIJE U RIBARSTVU

Član 59. (Vođenje evidencije u slatkovodnom ribarstvu)

- (1) Fizičko, pravno i svako drugo lice koje je korisnik nekog od prava dobijenih na osnovu odredbi ovog Zakona i propisa donesenih na osnovu njega, obavezno je voditi evidenciju o ulovu ili proizvodnji ribe.
- (2) Lice iz stava (1) ovog člana obavezno je nadležnom ministarstvu dostaviti Godišnji izvještaj o ulovu ili proizvodnji ribe u propisanom roku.
- (3) Federalni ministar propisuje oblik i sadržaj Registra o izdatim rješenjima, uvjerenjima, dozvolama, ovlaštenjima, odobrenjima i saglasnostima, način vođenja registra, oblik i sadržaj obrasca o vođenju evidencije u privrednom, sportskom, privredno-sportskom ribolovu i akvakulturi, te druga pitanja vezana za vođenje evidencije u ribarstvu.

DIO SEDMI – NADZOR

Poglavlje 1 – Upravni nadzor

Član 60.

(Upravni nadzor)

- (1) Federalno ministarstvo vrši upravni nadzor nad provođenjem ovog Zakona i propisa donesenih na osnovu ovog Zakona koji su stavljeni u nadležnost Federacije kao i upravni nadzor nad institucijama, federalnim i kantonalnim organizacijama, pravnim licima, ovlaštenim ustanovama, u obavljanju poslova određenih ovim Zakonom, a koji predstavljaju vršenje javnih ovlaštenja.
- (2) U vršenju nadzora nad izvršavanjem poslova u vršenju javnih ovlaštenja iz stava (1) ovog člana, Federalno ministarstvo ostvaruje neposredan uvid i kontrolu u postupanju, vrši pregled akata i dokumentacije koje donose institucije, upravne organizacije, ovlaštene ustanove i ovlaštena pravna lica u vršenju javnih ovlaštenja, daje instrukcije i smjernice za izvršavanje poslova i traži podatke i obavještenja o izvršavanju poslova u vršenju javnih ovlaštenja.
- (3) Federalno ministarstvo vrši i nadzor nad kantonalnim ministarstvima u dijelu izvršavanja federalne politike kao i provođenja mjera koje su od značaja za cijelu Federaciju.
- (4) Upravni nadzor nad kantonalnim ministarstvima, institucijama i pravnim licima koja vrše javna ovlaštenja vrši se u žalbenom postupku i kroz ovlaštenja drugostepenog organa i po službenoj dužnosti.
- (5) Kantonalna ministarstva vrše upravni nadzor nad provođenjem ovog Zakona i propisa donesenih na osnovu ovog Zakona, koji su stavljeni u nadležnost kantona. Protiv rješenja kantonalnog ministarstva može se izjaviti žalba Federalnom ministarstvu u roku od 15 (petnaest) dana od dana prijema rješenja.

Poglavlje 2 - Inspekcijski nadzor

Član 61.

(Federalna poljoprivredna inspekcija)

- (1) U provođenju inspekcijskog nadzora iz oblasti slatkovodnog ribarstva federalni poljoprivredni inspektor je ovlašten i obavezan provoditi kontrolu:
 - a) donošenja akta o određivanju ribolovnih područja i ribolovnih zona;
 - b) vođenjem katastra ribolovnog područja;
 - c) stručne osposobljenosti lica koja obavljaju poslove u oblasti slatkovodnog ribarstva;
 - d) izrade, ostvarivanja implementacije i revizije Ribarskih osnova;
 - e) izrade, ostvarivanja implementacije i revizije Programa revitalizacije;
 - f) poslovnih knjiga, dokumenata i evidencije pravnih lica koje se odnose na sprovođenje odredaba ovog Zakona i propisa donesenih na osnovu njega;

- g) rada Saveza u poslovima koji su mu povjereni kao javne ovlasti ovim Zakonom;
 - h) provođenja odredaba ovog Zakona u posebnim vidovima ribolova;
 - i) provođenja odredaba ovog Zakona u sportskom ribolovu;
 - j) provođenja odredaba ovog Zakona u akvakulturi;
 - k) provođenja odredaba ovog Zakona o provođenju mjera približavanja i premještanja riba;
 - l) rada ribljih staza, odnosno nadzor nad slobodnim i kontinuiranim prolaskom riba;
 - m) obaveza subjekata prema realizaciji Godišnjih i Privremenih programa upravljanja, zaštite i unapređenja ribolovnih područja;
 - n) obaveza subjekata prema realizaciji posebnih programa upravljanja, zaštite i unapređenja ribolovnih područja korištenje sredstava ostvarenih po osnovu kontinuirane štete u zaštiti i očuvanju ribolovnih voda konkretne ribolovne zone;
 - o) subjektima izdatih akata dozvola i rješenja koji se odnose na registraciju i izvedbu svih aktivnosti a donesenih po osnovama ovog Zakona;
 - p) načina raspodjele i utroška sredstava od naknade za obavljanje privrednog ribolova i za korištenje ribolovnog područja/zone (ribolovnog prava).
- (2) Pored posebnih ovlasti, federalni poljoprivredni inspektor, cijeneći u postupku inspekcijskog nadzora sa ciljem adekvatnog utvrđivanja činjenica, može nadzirati i postupati po osnovama sadržanim u članu 62. ovog Zakona koje su direktno povjerene kantonalnoj poljoprivrednoj inspekciji.
- (3) Federalni poljoprivredni inspektor ovlašten je i za provedbu nadzora i svih ostalih subjekata i poslova propisanih i povjerenih drugim subjektima po osnovama ovog Zakona (član 10. i član 11.).
- (4) Ukoliko nađe da je povrijeđen ovaj Zakon ili drugi propis donesen na osnovu njega, federalni poljoprivredni inspektor je ovlašten:
- a) rješenjem narediti otklanjanje utvrđenih nedostataka, odnosno nepravilnosti u određenom roku subjektima na koje se ovaj Zakon odnosi;
 - b) rješenjem izreći mjeru privremene obustave aktivnosti, djelatnosti ili povjerenih poslova u skladu sa ovlastima datim ovim Zakonom i propisima donesenim na osnovu njega i posebnim zakonom koji reguliše prekršaje;
 - c) izdati prekršajni nalog odnosno podnijeti nadležnom sudu prijavu za pokretanje prekršajnog postupka;
 - d) postupiti u skladu sa Zakonom o prekršajima, a po osnovama ovlasti i datih ovim Zakonom i propisima donesenim na osnovu njega;
 - e) preduzeti i druge mjere, odnosno izvršiti druge radnje za koje je ovim i posebnim propisima ovlašten;
 - f) u slučaju da upravitelj ne provodi obaveze predviđene Posebnim programom o korištenju sredstava ostvarenih po osnovu kontinuirane štete u zaštiti i očuvanju ribolovnih voda odobrenim od Federalnog ministarstva, naložiti trenutnu obustavu realizacije i korištenja sredstava sa za te potrebe namjenjenog računa do konačnog rješenja.
- (5) U slučaju utvrđenog nenamjenskog korištenja sredstava po istim osnovama, federalni inspektor je ovlašten preduzeti i mjere predviđene posebnim propisima.

Član 62.
(Kantonalna poljoprivredna inspekcija)

- (1) Kantonalna poljoprivredna inspekcija obavlja sve poslove inspekcijskog nadzora osim poslova za koje je ovim Zakonom određeno da ih direktno obavlja federalna poljoprivredna inspekcija, a naročito da:
- a) kontroliše donošenje i sprovođenje godišnjeg plana, odnosno pojedinih mjera utvrđenih tim planom;
 - b) nadzire izdavanje ribolovnih dozvola od strane izdavaoca dozvole do krajnjeg korisnika;
 - c) vodi službene podatke za područje kantona o povredama odredaba ovog Zakona i propisa donesenih na osnovu njega;
 - d) aktivnosti koje provodi fizičko ili pravno lice koje obavlja poslove u oblasti šumarstva i/ili koje je vlasnik objekata za smještaj i preradu drveta i šumske mehanizacije, a koje imaju utjecaj na riblji fond i njihovo stanište;
 - e) izvještava nadležne organe o nepravilnostima i predlaže provođenje određenih mjera, ako sam nije ovlašten za preduzimanje odgovarajućih mjera;
 - f) uzima potrebne službene uzorke radi analize ribe drugih vodenih organizama u nadležnoj laboratoriji. Troškove analize službenih uzoraka nastalih u postupku snosi stranka;
 - g) izdaje prekršajne naloge odnosno podnosi prijavu za pokretanje prekršajnog postupka radi povrede odredaba ovog Zakona i propisa donesenih na osnovu njega.
- (2) Kada utvrdi da je povrijeđen ovaj Zakon ili drugi propis donesen na osnovu njega, kantonalni poljoprivredni inspektor ima pravo i obavezu da:
- a) zabrani zatvaranje ili crpljenje vode iz dijela ribolovnog područja, ako se time prouzrokuje opasnost za opstanak ribe;
 - b) zabrani naglo ispuštanje vode iz prirodnih i vještačkih jezera i drugih akumulacija, ako se time prouzrokuje opasnost za opstanak ribe;
 - c) zabrani ispuštanje štetnih i opasnih materija u ribolovnu vodu;
 - d) zabrani obavljanje akvakulture i promet ribe, riblje mlađi i oplodene ikre, ako se vrši suprotno odredbama ovog Zakona;
 - e) zabrani lov ribe nedozvoljenim sredstvima;
 - f) zabrani lov ribe, ako se isti vrši suprotno odrednicama zabrane sadržanim u članu 52. ovog Zakona;
 - g) naredi spašavanje ribe i riblje mlađi sa zemljišta koje je poplavljeno;
 - h) zabrani kretanje licima bez dozvole sa sredstvima i alatima za ribolov na putevima pored i unutar ribolovnog područja, ribnjaka ili drugih ribolovnih voda;
 - i) zabrani držanje sredstava i alata za ribolov u objektima i na objektima koji se nalaze na ribolovnoj vodi ili na drugim objektima na ribolovnom području, licu koje nije ovlašteno da obavlja ribolov;
 - j) zabrani obavljanje aktivnosti, mehaničke/fizičke zahvate na zemljištu u blizini vodotoka, ribolovnih voda, koje mogu rezultirati zamućenjem ribolovnih voda i vodotoka;

- k) privremeno, do odluke nadležnog organa, oduzme od korisnika ili fizičkog lica sredstva i alat za ribolov, kao i ulov i druge predmete upotrijebljene za izvršenje radnje kažnjive po ovom Zakonu i predmete nastale izvršenjem takve radnje i bez odlaganja preda nadležnom organu; .
- (3) Kada nadležni inspektor prilikom vršenja inspekcijskog nadzora utvrdi da propis nije primijenjen ili je nepravilno primijenjen, donijet će rješenje kojim će naložiti otklanjanje utvrđene nepravilnosti i odrediti rok u kome se one moraju otkloniti.
- (4) Ako je zakonom ili drugim propisom predviđeno da se za utvrđene nepravilnosti primjenjuju određene upravne mjere, inspektor će u rješenju iz stava (3) ovog člana izreći i tu mjeru.
- (5) Protiv rješenja kantonalnog poljoprivrednog inspektora može se izjaviti žalba direktoru Federalne uprave za inspekcijske poslove u roku od 8 (osam) dana od dana prijema rješenja.
- (6) Protiv rješenja federalnog poljoprivrednog inspektora može se izjaviti žalba Federalnom ministarstvu u roku od 8 (osam) dana od dana prijema rješenja. Kad je za izvršavanje poslova inspekcijskog nadzora potrebno uzeti uzorke i izvršiti analizu nadležni poljoprivredni inspektor će uzeti uzorke (u daljem tekstu: službeni uzorak) i dati ih na laboratorijske pretrage u laboratorije koje ispunjavaju uslove za takve pretrage i analize.
- (7) Troškove analize službenih uzoraka nastalih u postupku snosi stranka.

DIO OSMI - KAZNE NE ODREDBE

Član 63. (Kaznene odredbe)

- (1) Novčanom kaznom od 20.000 KM do 50.000 KM kazniće se za prekršaj pravno lice ako:
- a) svojim aktivnostima u ribolovnoj vodi ili u području ribolovne vode izazove ili pričinu štetu ribljem fondu iz člana 53. stav (1);
 - b) nenadoknadi štetu pričinjenu ribljem fondu u propisanom roku iz člana 53. stav (1), člana 54. stav (8), člana 55. stav (8) i člana 56. stav (1);
 - c) ne izmiri troškove izrade revizije ribolovne osnove prilikom izazivanja ili činjenja štete ribljem fondu iz člana 53. stav (5);
 - d) ne izmiri troškove izrade Programa revitalizacije i Revizije programa revitalizacije iz člana 57;
 - e) pregradi vodotok u ribolovnoj vodi i onemogući slobodan prolaz - migraciju riba iz člana 54. stava (1);
 - f) ne izgradi riblju stazu u propisanom roku iz člana 54. st. (4) i (5);
 - g) po prestanku rada ne odstrani branu sa ribolovne vode a ribolovnu vodu dovede u stanje od prije izgradnje brane u propisanom roku iz člana 54. stava (7);
 - h) izvodi građevinske ili bilo koje druge radove u ribolovnoj vodi i priobalnom pojasu ribolovne vode iz člana 55. stav (1);

- i) u ribolovnoj vodi i priobalnom pojasu ribolovne vode, izgradnjom novih ili rekonstrukcijom postojećih objekata u vodoprivredi, građevinarstvu, šumarstvu, rudarstvu i svim drugim privrednim djelatnostima, uznemirava i čini štetu ribljem fondu, te spiječava slobodnu migraciju riba iz člana 55. st. (2), (3) i (11);
 - j) ne obezbijedi normalan protok vode i slobodnu migraciju riba iz člana 55. stav (4);
 - k) ribolovnu vodu i njeno korito koristi kao saobraćajnicu za mehanizaciju ili plovni put za predmete privrednih djelatnosti iz člana 55. stav (5);
 - l) direktno ili indirektno muti ribolovnu vodu duže od 48 sati u vremenskom roku od 10 (deset) dana iz člana 55. stav (6);
 - m) muti vodu u vrijeme lovostaja iz člana 55. stav (7);
 - n) ne posjeduje i ne održava u funkciji uređaje koji onemogućavaju ulazak ribe iz ribolovnih voda u dovodne, odvodne, turbinske i druge kanale iz člana 54. stav (11);
 - o) u posebnom staništu, posebnim ribolovnim stazama ili ribolovnim vodama sa zabranom ribolova vadi šljunak, pijesak, kamen, panjeve i bilo koje druge materijale, koristiti čamac ili druga plovila, zahvatati ili crpiti vodu, odlagati i deponovati bilo kakav materijal, prati vozila, kupati se i kupati stoku i kućne ljubimce, te vršiti druge radnje i zahvate i provoditi aktivnosti koje plaše ili ometaju ribe iz člana 49. stav (7), člana 50. stav (7) i člana 51. stav (5);
 - p) blagovremeno i u potpunosti ne ispunjava obaveze propisane Programom revitalizacije i Revizije programa revitalizacije iz člana 57. stav (1).
- (2) Za prekršaj iz stava (1) ovog člana kazniće se i odgovorno lice u pravnom licu novčanom kaznom od 2.000 KM do 5.000 KM.
- (3) Za prekršaj iz stava (1) ovog člana, pored novčane kazne izriče se i zaštitna mjera oduzimanja predmeta koji su upotrijebljeni ili bili namijenjeni izvršenju prekršaja ili su nastali njegovim izvršenjem i zaštitna mjera oduzimanja imovinske koristi pribavljene izvršenjem prekršaja.
- (4) Sredstva dobivena od novčanih kazni za prekršaje i izrečenih zaštitnih mjera po odredbama ovoga Zakona su prihod Budžeta Federacije Bosne i Hercegovine.

Član 64. **(Kaznene odredbe)**

- (1) Novčanom kaznom od 5.000 KM do 10.000 KM kazniće se za prekršaj pravno lice, fizičko lice-obrtnik, ovlaštena ustanova i udruženje ako:
- a) ne donese Program revitalizacije životnih zajednica u propisanom roku iz člana 57. stav (1);
 - b) ne uradi reviziju programa revitalizacije životnih zajednica u propisanom roku iz člana 57. stav (5);
 - c) korisniku ribolovnog prava ne omogući slobodan pristup ribljoj stazi iz člana 54. stav (10);
 - d) prije početka izvođenja radova u ribolovnoj vodi i priobalnom pojasu ribolovne vode ne upozna korisnika ribolovnog prava sa istim u propisanom roku iz člana 55. stav (10);
 - e) privredni ribolov obavlja bez dozvole za privredni ribolov iz člana 16. stav (2);

- f) dozvolu za privredni ribolov ustupi ili prenese na drugo lice iz člana 17. stav (9);
- g) obavlja privredni ribolov nakon oduzimanja ili prestanka važenja dozvole za privredni ribolov iz člana 20. stav (1);
- h) ne obezbijedi stručno vođenje poslovima privrednog ribolova iz člana 21. stav (2);
- i) privredni ribolov obavlja u vrijeme privremenog ograničenja ili zabrane obavljanja privrednog ribolova iz člana 19. stav (1);
- j) privredni ribolov obavlja u posebnim staništima i/ili ribolovnim vodama sa zabranom ribolova iz člana 49. stav (5), člana 52. stav (1);
- k) u privrednom ribolovu lovi i zadržava ribu nakon ulova, odnosno sortiranja na plovilu ili kopnu, prevozi, skladišti, prerađuje, izlaže, prodaje, stavlja u promet ribu za vrijeme lovostaja iz člana 52. stav (1) tačka c);
- l) u privrednom ribolovu lovi i zadržava ribu nakon ulova, odnosno sortiranja na plovilu ili kopnu, prevozi, skladišti, prerađuje, izlaže, prodaje, stavlja u promet ribu ispod minimalne i maksimalne propisane veličine iz člana 52. stav (1) tačka d);
- m) u privrednom ribolovu lovi ribu podvodnom puškom, ostima, harpunima i drugim nedopuštenim alatima i priborom iz člana 52. stav (1) tačka k);
- n) u privrednom ribolovu lovi ribu eksplozivnim ili hemijskim sredstvima koja ih ubijaju, truju ili omamljuju iz člana 52. stav (1) tačka p);
- o) u privrednom ribolovu lovi ribu strujom visokog napona ili agregatima za elektroribolov iz člana 52. stav (1) tačka m);
- p) u privrednom ribolovu koristi ehosonar i druge elektronske uređaje iz člana 52. stav (1) tačka n);
- q) u privrednom ribolovu lovi ribu u ribolovnim vodama uz upotrebu strane riblje vrste (žive ili mrtve) kao mamca iz člana 52. stav (1) tačka i);
- r) ribolovno pravo ustupi ili prenese na drugo lice iz člana 23. stav (11);
- s) ne obezbijedi stručno vođenje poslova upravljanja ribolovnim područjem/zonom koje mu je dodjeljeno na korištenje u propisanom roku iz člana 24. stav (3);
- t) ne donese i Federalnom ministarstvu ne dostavi na usvajanje Ribolovnu osnovu u propisanom roku iz člana 27. stav (1);
- u) ne uradi i Federalnom ministarstvu ne dostavi na usvajanje Reviziju ribolovne osnove u propisanom roku iz člana 27. stav (4);
- v) ne uradi i Federalnom ministarstvu ne dostavi na usvajanje Privremeni program u propisanom roku iz člana 29. stav (1);
- w) donosi interne akte koji su u suprotnosti sa odredbama ovog Zakona i propisa donijetim na osnovu njega iz člana 26. st. (1) i (2);
- x) ne organizuje ribočuvarsku službu u propisanom roku iz člana 36. stav (1);
- y) za ribočuvara imenuje lice u suprotnosti s odredbama ovog Zakona iz člana 36. stav (4);
- z) ne vrši približavanje ribolovnih voda ili približavanje ne obavlja u skladu sa ribolovnom osnovom i Godišnjim programom iz člana 47. st. (1) i (3);
- aa) vrši približavanje neautohtonim-alohtonim vrstama riba ili ribama neutvrđenih genetskih karakteristika iz člana 47. stav (4);

- bb) ribolovne vode poribljava ribom koja potječe iz ribogojilišta koje ne posjeduje odobrenje za uzgoj autohtonih vrsta riba iz člana 47. stav (5);
- cc) ne uvede zabranu ribolova u poribljenom području u propisanom roku iz člana 47. stav (6);
- dd) omogući lov ribe u posebnim staništima i ribolovnim vodama sa zabranom ribolova iz člana 52. stav (1) tačka b);
- ee) u sportskom ribolovu omogući lov i zadržavanje ribe neposredno nakon ostvarivanja ulova za vrijeme lovostaja iz člana 52. stav (1) tačka c);
- ff) u sportskom ribolovu omogući lov i zadržavanje ribe neposredno nakon ostvarivanja ulova ispod minimalne i maksimalne propisane veličine iz člana 52. stav (1) tačka d);
- gg) omogući da se riba ulovljena u sportskom ribolovu stavlja u promet iz člana 52. stav (1) tačka e);
- hh) u posebnim staništima, posebnim ribolovnim stazama i ribolovnim vodama sa zabranom ribolova omogući vađenje šljunka, pijeska, kamena, panjeva i bilo kojeg drugog materijala, korištenje čamca ili drugog plovila, zahvatanje ili crpljenje vode, odlaganje i deponovanje bilo kakvog materijala, pranje vozila, kupanje i kupanje stoke i kućnih ljubimaca, te vršenje drugih radnji i zahvata i provođenje aktivnosti koje plaše ili ometaju ribu iz člana 49. stav (7), člana 50. stav (7) i člana 51. stav (5);
- ii) omogući lov ribe u ribolovnim vodama uz upotrebu strane riblje vrste (žive ili mrtve) kao mamca iz člana 52. stav (1) tačka i);
- jj) omogući lov ribe podvodnom puškom, ostima, harpunima i drugim nedopuštenim alatima i priborom iz člana 52. stav (1) tačka k);
- kk) omogući lov ribe mrežama, vršama, parangalima ili drugim profesionalnim ribarskim alatima i priborom iz člana 52. stav (1) tačka l);
- ll) koristi agregat za elektroribolov ili omogući njihovo korištenje u sportskom ribolovu iz člana 52. stav (1) tačka m);
- mm) koristi ehosonar i druge elektronske uređaje ili omogući njihovo korištenje u sportskom ribolovu iz člana 52. stav (1) tačka n);
- nn) omogući lov ribe noću iz člana 52. stav (1) tačka o);
- oo) ne posjeduje dozvolu za privredno-sportski ribolov iz člana 37. stav (2);
- pp) dozvolu za privredno-sportski ribolov ustupi ili prenese na drugo lice iz člana 38. stav (5);
- qq) obavlja privredno-sportski ribolov nakon oduzimanja ili prestanka važenja dozvole za privredno-sportski ribolov iz člana 39. stav (1);
- rr) u ribnjaku drži alohtone vrsta riba i drugih vodenih organizama bez odobrenja Federalnog ministarstva iz člana 38. stav (7) i člana 38. stav (11);
- ss) provodi ribolov radi obavljanja naučnih i stručnih poslova u oblasti slatkovodnog ribarstva bez odgovarajućeg ovlaštenja iz člana 52. stav (1) tačka v);
- tt) bez odgovarajuće dozvole obavlja ribolov u naučno-istraživačke svrhe, selektivni ili sanacioni ribolov iz člana 40. stav (2) i člana 52. stav (1) tačka w);
- uu) dozvolu za ribolov u naučno-istraživačke svrhe, selektivni ili sanacioni ribolov ustupi ili prenese na drugo lice iz člana 40. stav (6);
- vv) akvakulturu obavlja bez dozvole za akvakulturu iz člana 41. stav (2);

- ww) dozvolu za akvakulturu ustupi ili prenese na drugo lice iz člana 42. stav (5);
 - xx) obavlja djelatnost akvakulture nakon oduzimanja ili prestanka važenja dozvole za akvakulturu iz člana 44. stav (1);
 - yy) ne obezbijedi stručno vođenje poslova akvakulture u propisanom roku iz člana 42. stav (6);
 - zz) uvozi ili u ribogojilištu drži i uzgaja alohtone vrste riba i drugih vodenih organizama bez odobrenja za uvoz i uzgoj alohtonih vrsta riba iz člana 43. stav (3);
 - aaa) odobrenje za uzgoj autohtonih vrsta riba ustupi ili prenese na drugo lice iz člana 43. stav (8);
 - bbb) odobrenje za uvoz i uzgoj alohtonih vrsta riba ustupi ili prenese na drugo lice iz člana 43. stav (8);
- (2) Za prekršaj iz stava (1) ovog člana kazniće se i odgovorno lice u pravnom licu novčanom kaznom od 500 KM do 1.000 KM.

Član 65. (Kaznene odredbe)

- (1) Novčanom kaznom od 500 KM do 3.000 KM kazniće se za prekršaj pravno lice, fizičko lice-obrtnik, ovlaštena ustanova i udruženje ako:
- a) privredni ribolov obavlja na onom dijelu ribolovnog područja/zone koji nije upisan u dozvolu iz člana 21. stav (1);
 - b) privredni ribolov obavlja ribolovnim alatima i opremom koji nisu upisani u dozvolu iz člana 21. stav (1);
 - c) obavlja ribolov u količini većoj od upisane u dozvolu iz člana 21. stav (1);
 - d) privredni ribolov obavlja ribolovnim alatima i opremom koji nisu na propisan način označeni iz člana 21. stav (1);
 - e) u privrednom ribolovu lovi ribu u depresijama, barama, poplavljenim površinama i drugim vodenim površinama koje nastaju povlačenjem vode iz člana 52. stav (1) tačka h);
 - f) vidno ne označi granice ribolovnog područja/zone za koju je dobio ribolovno pravo u propisanom roku iz člana 31. stav (1);
 - g) vidno ne označi granice posebnog staništa, posebne ribolovne staze i ribolovne vode sa zabranom ribolova u propisanom roku iz člana 49. stav (4), člana 50. stav (4) i člana 51. stav (3);
 - h) u privrednom ribolovu lovi ribu u virovima, barama, rukavcima, i dr. koji su zbog niskog vodostaja odvojeni od glavnog vodotoka ili kroz njih ne teče vodotok iz člana 52. stav (1) tačka r);
 - i) u privrednom ribolovu lovi ribu direktno rukom, povlačenjem i kaćanjem udicom s vanjske strane tijela ribe iz člana 52. stav (1) tačka s);
 - j) u privrednom ribolovu lovi ribu unutar ograđenog prostora hidroenergetskog objekta, te 100 metara uzvodno i nizvodno od ograde hidroenergetskog objekta iz člana 52. stav (1) tačka t);
 - k) u privrednom ribolovu lovi ribe 100 metara uzvodno i nizvodno od ograde objekata akvakulture iz člana 52. stav (1) tačka u);

- l) za vrijeme obavljanja ribolova ne posjeduje dozvolu kod sebe ili na plovilu iz člana 21. stav (3);
- m) spriječava obavljanje ribočuvarskog nadzora ili ribočuvaru ne pruža sve potrebne podatke i obavijesti u vezi sa obavljanjem privrednog ribolova iz člana 21. stav (5);
- n) ne vodi evidenciju o ribolovu i ulovu ribe u privrednom ribolovu iz člana 21. stav (6);
- o) Kantonalnom ministarstvu ne dostavi Godišnji izvještaj o ulovu ribe u privrednom ribolovu iz člana 21. stav (6);
- p) Kantonalnom ministarstvu ne dostavi podatke neophodne za vođenje Katastra ribolovnih voda u propisanom roku iz člana 15. stav (8);
- q) Kantonalnom ministarstvu ne dostavi Godišnji program u propisanom roku iz člana 28. stav (2);
- r) Kantonalnom ministarstvu ne dostavi Izvještaj o realizaciji Godišnjeg programa za prethodnu godinu u propisanom roku iz člana 28. stav (5);
- s) ne uskladi Godišnji program sa Godišnjim programom susjednog ribolovnog područja ili zone iz člana 28. stav (6);
- t) ne vodi evidenciju o ribolovu i ulovu ribe u sportskom ribolovu iz člana 32. stav (10);
- u) Kantonalnom ministarstvu ne dostavi Godišnji izvještaj o ulovu ribe u sportskom ribolovu u propisanom roku iz člana 32. stav (10);
- v) izdaje ribolovne dozvole ribolovcu koje nisu u skladu sa odredbama Pravilnika o sportskom ribolovu iz člana 32. stav (4);
- w) izdaje ribolovnu dozvolu za tekuću godinu ribolovcu koji nije dostavio godišnji izvještaj za prethodnu godinu iz člana 34. stav (8);
- x) u ribnjaku drži one vrste i one količine ribe koje nisu upisane u dozvolu za privredno-sportski ribolov iz člana 38. stav (6);
- y) ne vodi evidenciju o privredno-sportskom ribolovu iz člana 38. stav (8);
- z) Federalnom ministarstvu ne dostavi Godišnji izvještaj o privredno-sportskom ribolovu u propisanom roku iz člana 38. stav (8);
- aa) kod sebe ne posjeduju dozvolu za ribolov u naučno-istraživačke svrhe, selektivni ili sanacioni ribolov iz člana 40. stav (7);
- bb) u ribogojilištu drži i uzgaja vrste i količine ribe koje nisu upisane u dozvolu za akvakulturu iz člana 42. stav (7);
- cc) ne vodi evidenciju o akvakulturi iz člana 42. stav (8);
- dd) Federalnom ministarstvu ne dostavi Godišnji izvještaj o akvakulturi u propisanom roku iz člana 42. stav (8);
- ee) u ribogojilištu drži vrste i količine ribe koji nisu upisane u odobrenje iz člana 43. stav (9);
- ff) u slučaju trajnog narušavanja fizičkih, hemijskih ili bioloških osobina ribolovnih voda ne preduzme mjere premještanja ribljeg fonda u druge ribolovne vode iz člana 48. stav (1);
- gg) u slučaju elementarnih nepogoda (poplava, suša, i sl.) ne preduzme mjere čuvanja, spašavanja i premještanja ribe iz člana 48. stav (2);

- hh) posebno stanište, posebnu ribolovnu stazu i ribolovnu vodu sa zabranom ribolova organizuje bez saglasnosti Federalnog ministarstva iz člana 49. stav (3), člana 50. stav (3) i člana 51. stav (2);
 - ii) omogući obavljanje sportskog ribolova bez odgovarajuće ribolovne dozvole iz člana 22. stav (2);
 - jj) omogući lov ribe u depresijama, barama, poplavljenim površinama i drugim vodenim površinama koje nastaju povlačenjem vode iz člana 52. stav (1) tačka h);
 - kk) omogući lov ribe s više ribolovnih alata ili opreme nego što je dozvoljeno odredbama ovog Zakona i propisima donesenim na osnovu njega iz člana 52. stav (1) tačka j);
 - ll) na bilo koji način sprječava povratak riba s poplavljenog područja u vodotoke, omogući lov ribe sredstvima koja sprječavaju povratak riba s poplavljenog područja te sprječava bilo koja druga migratorna kretanja riba iz člana 52. stav (1) tačka q);
 - mm) omogući lov ribe u virovima, barama, rukavcima, i dr. koji su zbog niskog vodostaja odvojeni od glavnog vodotoka ili kroz njih ne teče vodotok iz člana 52. stav (1) tačka r);
 - nn) omogući lov ribe direktno rukom, povlačenjem i kaćanjem udicom s vanjske strane tijela ribe iz člana 52. stav (1) tačka s);
 - oo) omogući lov ribe 100 metara uzvodno i nizvodno od ograde hidroenergetskog objekta iz člana 52. stav (1) tačka t);
 - pp) omogući lov ribe 100 metara uzvodno i nizvodno od ograde objekata akvakulture iz člana 52. stav (1) tačka u);
- (2) Za prekršaj iz stava (1) ovog člana kazniće se i odgovorno lice u pravnom licu novčanom kaznom od 100 KM do 300 KM.

Član 66. (Kaznene odredbe)

- (1) Novčanom kaznom od 3.000 KM do 5.000 KM kazniće se za prekršaj fizičko lice:
- a) lovi ribu podvodnom puškom, ostima, harpunima i drugim nedopuštenim alatima i priborom iz člana 52. stav (1) tačka k);
 - b) lovi ribu mrežama, vršama, parangalima ili drugim profesionalnim ribarskim alatima i priborom iz člana 52. stav (1) tačka l);
 - c) lovi ribu strujom visokog napona ili agregatima za elektroribolov iz člana 52. stav (1) tačka m);
 - d) u ribolovu koristi ehosonar i druge elektronske uređaje iz člana 52. stav (1) tačka n);
 - e) lovi ribu noću iz člana 52. stav (1) tačka o);
 - f) lovi ribu eksplozivnim ili hemijskim sredstvima koja ih ubijaju, truju ili omamljuju iz člana 52. stav (1) tačka p);
 - g) lovi ribu u ribolovnim vodama uz upotrebu strane riblje vrste (žive ili mrtve) kao mamca iz člana 52. stav (1) tačka i);
 - h) u posebnom staništu, posebnim ribolovnim stazama ili ribolovnim vodama sa zabranom ribolova vadi šljunak, pijesak, kamen, panjeve i bilo koje druge

materijale, koristiti čamac ili druga plovila, zahvatati ili crpiti vodu, odlagati i deponovati bilo kakav materijal, prati vozila, kupati se i kupati stoku i kućne ljubimce, te vršiti druge radnje i zahvate i provoditi aktivnosti koje plaše ili ometaju ribe iz člana 49. stav (7); člana 50. stav (7) i člana 51. stav (5).

Član 67. **(Kaznene odredbe)**

- (1) Novčanom kaznom od 1.000 KM do 2.000 KM kazniće se za prekršaj fizičko lice:
- a) lovi ribu uz upotrebu nedopuštenih ribolovnih alata, opreme i mamaca iz člana 34. stav (4);
 - b) lovi ribu bez ribolovne dozvole ili važeće ribolovne dozvole iz člana 52. stav (1) tačka a);
 - c) lovi ribu u posebnim staništima i ribolovnim vodama sa zabranom ribolova iz člana 52. stav (1) tačka b) ;
 - d) za vrijeme lovostaja lovi i zadržava ribu neposredno nakon ostvarivanja ulova u sportskom ribolovu iz člana 52. stav (1) tačka c);
 - e) ispod minimalne i maksimalne propisane veličine lovi i zadržava ribu neposredno nakon ostvarivanja ulova u sportskom ribolovu iz člana 52. stav (1) tačka d);
 - f) ribu ulovljenu u sportskom ribolovu stavlja u promet iz člana 52. stav (1) tačka e);
 - g) ometa postavljanje znakova ili skida znakove kojima se označava ribolovno područje/zona, posebno stanište, posebne ribolovne staze i ribolovne vode sa zabranom ribolova iz člana 52. stav (1) tačka y);
 - h) na ribolovnoj vodi ili neposredno uz nju nosi ili posjeduje u vozilu ili plovilu otrovne, nagrizajuće ili omamljujuće materije, eksplozivna sredstva, materije koje u kombinaciji s drugim materijama mogu proizvesti eksploziju, mreže, vrše, parangale podvodne puške, osti, harpune, uređaje za ribolov električnom strujom ili druga nedopuštena sredstva iz člana 52. stav (1) tačka z).

Član 68. **(Kaznene odredbe)**

- (1) Novčanom kaznom od 200 KM do 1.000 KM kazniće se za prekršaj fizičko lice:
- a) ribočuvaru ne omogući obavljanje ribočuvarskog nadzora iz člana 34. stav (3);
 - b) lovi ribu s mosta i objekata koji se nalaze na ili iznad vodene površine i koji nisu udaljeni više od 2 metra od obale iz člana 52. stav (1) tačka f);
 - c) koristi plovilo za obavljanje sportskog ribolova iz člana 34. stav (5) i člana 52. stav (1) tačka g);
 - d) lovi ribu u depresijama, barama, poplavljenim površinama i drugim vodenim površinama koje nastaju povlačenjem vode iz člana 52. stav (1) tačka h);
 - e) ribe zadržane u ulovu ne upiše u ribolovnu dozvolu u propisanom roku iz člana 34. stav (7);
 - f) ne vodi evidenciju o ribolovu i ulovu ribe iz člana 34. stav (8);

- g) korisniku ribolovnog prava ne dostavi Izvještaj o godišnjem ulovu u propisanom roku iz člana 34. stav (8);
- h) lovi ribu s više ribolovnih alata ili opreme nego što je dozvoljeno odredbama ovog Zakona i propisima donesenim na osnovu njega iz člana 52. stav (1) tačka j);
- i) na bilo koji način sprječava povratak riba s poplavljenog područja u vodotoke, lovi ribu sredstvima koja sprječavaju povratak riba s poplavljenog područja te sprječava bilo koja druga migratorna kretanja riba iz člana 52. stav (1) tačka q);
- j) lovi ribu u virovima, barama, rukavcima, i dr. koji su zbog niskog vodostaja odvojeni od glavnog vodotoka ili kroz njih ne teče vodotok iz člana 52. stav (1) tačka r);
- k) lovi ribu direktno rukom, povlačenjem i kaćanjem udicom s vanjske strane tijela ribe iz člana 52. stav (1) tačka s);
- l) lovi ribu unutar ograđenog prostora hidroenergetskog objekta, te 100 metara uzvodno i nizvodno od ograde hidroenergetskog objekta iz člana 52. stav (1) tačka t);
- m) lovi ribe 100 metara uzvodno i nizvodno od ograde objekata akvakulture iz člana 52. stav (1) tačka u);
- n) uz ribolovnu vodu ili u plovilu ostavlja ribolovni alat ili opremu ili ulov bez nadzora i osiguranja vlasnika istoga iz člana 52. stav (1) tačka aa);
- o) pere vozila, kupa stoku i kućne ljubimce u ribolovnoj vodi uz upotrebu štetnih i opasnih sredstava iz člana 52. stav (1) tačka bb).

Član 69.

(Kaznene odredbe)

- (1) Za prekršaje iz čl. 63., 64., 65., 66., 67. i 68. ovog Zakona, pored novčane kazne izriče se i zaštitna mjera oduzimanja predmeta koji su upotrijebljeni ili bili namijenjeni izvršenju prekršaja ili su nastali njegovim izvršenjem i zaštitna mjera oduzimanja imovinske koristi pribavljene izvršenjem prekršaja.
- (2) Sredstva dobivena od novčanih kazni za prekršaje i izrečenih zaštitnih mjera iz čl. 63., 64. i 65. ovog Zakona su prihod Budžeta Federacije.
- (3) Sredstva dobivena od novčanih kazni za prekršaje i izrečenih zaštitnih mjera iz čl. 66., 67. i 68. ovog Zakona su prihod korisnika ribolovnog prava i mogu se koristiti isključivo za otklanjanje i sanaciju nastale štete i zaštitu i unaprijeđenje ribljeg fonda.

DIO DEVETI - PRIJELAZNE I ZAVRŠNE ODREDBE

Član 70.

(Rok za usklađivanje)

Korisnici ribolovnog prava, dozvola za privredni i privredno-sportski ribolov i akvakulturu dužni su u roku od godinu dana od dana stupanja na snagu ovog Zakona uskladiti svoje poslovanje sa odredbama ovog Zakona.

Član 71.

(Rok za donošenje podzakonskih akata)

Podzakonski akti za sprovođenje ovog Zakona donjeće se u roku od dvije godine od stupanja na snagu ovog Zakona.

Član 72.

(Primjena važećih propisa)

Do donošenja propisa iz člana 71. ovog Zakona primjenjivaće se podzakonski propisi doneseni na osnovu Zakona o slatkovodnom ribarstvu („Službene novine Federacije BiH“, br. 64/04 i 27/10).

Član 73.

(Prestanak važenja propisa)

Danom stupanja na snagu ovog Zakona prestaje da važi Zakon o slatkovodnom ribarstvu („Službene novine Federacije BiH“, br. 64/04 i 27/10).

Član 74.

(Stupanje na snagu)

Ovaj Zakon stupa na snagu osmog dana od dana objave u „Službenim novinama Federacije BiH“.